

# ACTA APOSTOLICAE SEDIS

## COMMENTARIUM OFFICIALE



### SUMMARIUM

Acta Pii Pp. XII: Litterae encyclicae: de cultu Sacratissimi Cordis  
Iesu, p. 309 - Constitutio Apostolica, p. 354 - Litterae Apostolicae, p. 365.

### TYPIS POLYGLOTTIS VATICANIS

M · DCCCC · LVI

Directio:  
Palazzo Apostolico — Città del Vaticano

Administratio:  
Libreria Editrice Vaticana

Pretium annuae subnotationis:  
In Italia, Lib. 1500 — extra Italiam, Lib. 2000 vel \$ 5

Pretium unius fasciculi:  
In Italia, Lib. 100 — extra Italiam, Lib. 100 vel \$ 0,30

Libreria Vaticana subnotatoribus fasciculos Commentarii mittere potest etiam via aërea, charta indica impressos.

« Bis fere in mense (Commentarium) prodibit eo quotiescumque vel necessitas vel utilitas id postulare videbitur » (Ex Commentarii Officialis ratione, die 29 Octobris 1908 edita).

# INDEX HUIUS FASCICULI

(An. XXXXVIII, n. 7 - 31 Maii 1956)

## ACTA PII PP. XII

LITTERAE ENCYCLICAE		PAG.
<i>Haurietis aquas.</i> - Ad Venerabiles Fratres Patriarchas, Primate, Archiepiscopos, Episcopos aliosque locorum Ordinarios, pacem et communionem cum Apostolica Sede habentes: de Cultu Sacratissimi Cordis Iesu. - 15 Maii 1956		309
CONSTITUTIO APOSTOLICA		
<i>Sedes sapientiae.</i> - Principia dantur et Statuta generalia probantur, quibus Informari regique debent illi qui vocati sunt ad statum acquirendae religiosae perfectionis amplectendum eorumque educatores. - 31 Maii 1956		354
LITTERAE APOSTOLICAE		
I. <i>Magno afficimur.</i> - Beata Virgo Maria « a Bono Iesu », vulgo « Madonna del Buon Gesù » appellata, una cum		
S. Ioanne Baptista, Praecursore Domini et Martyre, Patrona Caelestis civitatis et dioecesis Fabrianensis constituitur. - 8 Septembris 1954		365
II. <i>Recens constitutas.</i> - Beata Maria V. in Caelum Assumpta praecipua Caelestis Patrona dioecesis Umtatanae declaratur. - 16 Novembris 1954		367
III. <i>Quasi arx.</i> - Beata Maria V., « a Glibilmanna » appellata, praecipua Patrona totius dioecesis Cephaludensis eademque sub titulo Immaculae Conceptionis venerata, primaria Patrona Urbis Cephaludii constituitur. - 3 Decembris 1954		368
IV. <i>Amica lucet.</i> - Beata Maria V., nomine « Auxilium Christianorum » invocata, primaria Patrona, et S. Patricius, Pont. et Conf. secundarius Patronus, dioecesis Bumburiensis declarantur. - 5 Martii 1955		369
V. <i>Sacra in claustra.</i> - Constitutiones approbantur Congregationis Sororum Servularum Beatissimae Virginis Mariae Immaculae. - 18 Ianuarii 1956		370

## LIBRERIA EDITRICE VATICANA CITTÀ DEL VATICANO

ANTONII BACCI  
VARIA LATINITATIS SCRIPTA  
editio tertia

Vol. I

### LEXICON EORUM VOCABULORUM QUAE DIFFICILIOUS LATINE REDDUNTUR

in-16°, pp. XII-712, linco connectum L. 4000 (\$ 7)

Vol. II

### INSCRIPTIONES, ORATIONES, EPISTULAE

in-16° pp. 360 - L. 1600 (\$ 3)  
duo volumina veneunt L. 5500 (\$ 9,60)







# ACTA APOSTOLICAE SEDIS

## COMMENTARIUM OFFICIALE

### ACTA PII PP. XII

#### LITTERAE ENCYCLICAE

AD VENERABILES FRATRES PATRIARCHAS, PRIMATES, ARCHIEPISCOPOS,  
EPISCOPOS ALIOSQUE LOCORUM ORDINARIOS, PACEM ET COMMUNIO-  
NEM CUM APOSTOLICA SEDE HABENTES: DE CULTU SACRATISSIMI  
CORDIS IESU.

PIUS PP. XII

VENERABILES FRATRES

SALUTEM ET APOSTOLICAM BENEDICTIONEM

« Haurietis aquas in gaudio de fontibus Salvatoris ».<sup>1</sup> Haec verba, quibus Isaias propheta significantibus imaginibus usus multiplicia illa atque uberrima Dei munera vaticinabatur, quae erat christiana aetas allatura, haec verba, dicimus, sponte menti succurrunt Nostrae, dum centesimum exeuntem annum recolimus, ex quo Decessor Noster imm. rec. Pius IX, votis libenter concedens, e catholico terrarum orbe delatis, Festum Sacratissimi Cordis Iesu in universa Ecclesia celebrari mandavit.

Nulla siquidem modo caelestia illa munera enumerari queunt, quae cultus, Sanctissimo Cordi Iesu tributus, in christifidelium animos perfundit, eos purificans, superno recreans solacio, ad omnesque adipiscendas excitans virtutes. Quam-

<sup>1</sup> Is. XII, 3.

obrem sapientissimae Iacobi Apostoli sententiae memores: « Omne datum optimum et omne donum perfectum desursum est, descendens a Patre luminum », <sup>2</sup> Nos iure meritoque hoc in eodem cultu, qui incensior usque ubique terrarum viget, inaestimabile cernimus donum, quod Incarnatum Verbum Divinusque Servator noster, utpote unus inter Caelestem Patrem humanumque genus gratiae veritatisque Mediator, Ecclesiae impertiit, mysticae Sponsae suae, postremo horum saeculorum cursu, quo tantos eadem exantlare labores difficultatesque eluctari debuit. Quo quidem inaestimabili dono Ecclesia fruens incensiores potest erga Divinum Conditoem suum patefacere caritatem, atque ampliorem quodam modo hortationem illam ad effectum deducere, quam Evangelista Ioannes ab ipso Iesu Christo prolatam refert: « In novissimo autem die magno festivitatis stabat Iesus, et clamabat dicens: Si quis sitit, veniat ad me et bibat qui credit in me. Sicut dicit Scriptura, flumina de ventre eius fluent aquae vitae. Hoc autem dixit de Spiritu, quem accepturi erant credentes in eum ». <sup>3</sup> Iis profecto qui Iesum loquentem audiebant, haud difficile erat haec verba, quibus ipse « aquae vitae » fontem pollicebatur e suo sinu oriturum, ad sacrorum effata vatum referre Isaiae, Ezechielis et Zachariae Regnum Messianicum vaticinantium itemque ad typicam illam petram, ex qua, a Moyse percussa, aqua mirandum in modum prosilivit. <sup>4</sup>

Divina caritas primum ducit ortum ex Spiritu Sancto, qui Amor est personalis tam Patris quam Filii in augustae Trinitatis sinu. Meritissimo igitur gentium Apostolus, quasi Iesu Christi verbis resonans, caritatis effusionem in credentium animos huic Amoris Spiritui attribuit: « Caritas Dei diffusa est in cordibus nostris per Spiritum Sanctum, qui datus est nobis ». <sup>5</sup>

<sup>2</sup> IAC. I, 17.

<sup>3</sup> IOAN. VII, 37-39.

<sup>4</sup> Cfr. IS. XII, 3; EZ. XLVII, 1-12; ZACH. XIII, 1; EX. XVII, 1-7; NUM. XX, 7-13; I COR. X, 4; APOC. VII, 17; XXII, 1.

<sup>5</sup> ROM. V, 5.

Arctissimus hic nexus, quem Sacra Eloquia inter divinam caritatem, quae in christianorum animis exardescat oportet, ac Spiritum Sanctum intercedere asseverant — qui quidem per se Amor est — luculenter nobis omnibus demonstrat, Venerabiles Fratres, intimam naturam ipsam illius cultus, qui Sacratissimo Iesu Christi Cordi adhibendus est. Etenim, ut prorsus constat hunc cultum, si peculiarem eius naturam consideremus, excellentissimum esse religionis actum, quatenus plenam et absolutissimam se devovendi et consecrandi voluntatem a nobis postulet Divini Redemptoris amori, cuius vulneratum Cor vivax est index et signum; ita constat pariter, quin immo altiore quodam modo, hunc eundem cultum id potissimum prae se ferre, ut Divinum Amorem amore nostro redamemus. Siquidem tantummodo ex caritatis vi id consequitur ut hominum animi Superni Numinis dominio plene perfecteque obtemperent, cum nempe amoris nostri affectus divinae voluntati ita haereat, ut veluti aliquid unum fiat, secundum illud: « Qui adhaeret Domino, unus spiritus est ».<sup>6</sup>

## I

Verumtamen, quamquam Ecclesia Sacratissimi Cordis Iesu cultum tanta semper in aestimatione habuit et habet, ut eum ubique gentium vigere et in populos christianos quovis modo propagari curet, itemque adversus *Naturalismi* et *Sentimentalismi*, ut aiunt, commenta omni ope eum tutari enitatur, nihilo secius valde dolendum est, praeteritis temporibus ac nostra quoque aetate, nobilissimum hunc cultum non in eodem honoris aestimationisque loco esse apud christianos nonnullos, atque interdum apud eos etiam, qui se catholicae religionis adipiscendaeque sanctitatis studio animatos esse profiteantur.

« Si scires donum Dei ».<sup>7</sup> Hisce verbis, Venerabiles Fratres,

<sup>6</sup> I Cor. VI, 17.

<sup>7</sup> IOAN. IV, 10.

Nos, qui arcano Dei consilio sacri illius fidei pietatisque thesauri, quem Divinus Redemptor Ecclesiae suae concredidit, custodes et dispensatores electi sumus, eos universos pro officii Nostri conscientia admonemus; qui quidem filii Nostri, quamvis Sacratissimi Cordis Iesu cultus, quasi de erroribus hominumque negligentia triumphantis, Mysticum suum Corpus pervaserit, attamen praeiudicatis adhuc opinionibus aguntur, atque eo usque interdum procedunt, ut eum spiritualibus Ecclesiae humanique generis necessitatibus, nostra hac aetate instantioribus, minus aptum, ne dicamus detrimentosum, existiment. Haud desunt enim qui, cum primariam ipsam huius cultus naturam peculiaribus variisque pietatis formis implicent atque exaequent, quas Ecclesia probat ac fovet, sed non iubet, eum putent quasi aliquid additicium, quod singuli, pro suis cuiusque libitis, adhibere possint; ac sunt etiam qui autument hunc eundem cultum onerosum esse atque iis praesertim nullius vel modicae utilitatis, qui in Dei Regno militent praecipuo eo consilio ducti, ut suis viribus, opibus suique temporis usura ad catholicam veritatem tuendam, tradendam propagandamque, ad christianam de re sociali doctrinam inculcandam, ad eosque religionis actus eaque opera provehenda allaborent, quae multo magis hodie necessaria ducant; ac denique non desunt qui tantum abest ut hunc cultum validum adiumentum iudicent ad christianos mores, cum in privata uniuscuiusque vita, tum in domestico convictu, recte conformandos renovandosque, ut eum potius cernant quasi quandam pietatem sensibus non mente animoque alitam, atque adeo potius mulieribus dignam, cum in eo aliquid videant excultis hominibus non satis consentaneum.

Sunt etiam praeterea qui, cum considerent eiusmodi cultum paenitentiam, expiationem ceterasque virtutes potissimum postulare, quas « passivas » vocant, utpote quae externos non edant fructus, eum aptum non aestiment ad spirituales nostrorum temporum pietatem refovendam, quae ad apertam impensam-



que actionem potius contendat necesse sit, ad catholicae fidei triumphum et ad strenuam tuitionem christianorum morum; qui quidem mores hodie, ut omnes norunt, fallacibus eorum commentis facile inficiuntur, qui ad quamlibet religionis formam se aequae habent, sublato in cogitando agendoque veri falsique discrimine, atque etiam *materialismi* athei et *laicismi*, ut aiunt, principiis misere inquinantur.

Quis non videat, Venerabiles Fratres, opinationes eiusmodi a sentiendi omnino discrepare, quas Decessores Nostri, Sacratissimi Cordis Iesu cultum comprobantes, ex hac veritatis cathedra publice ediderunt? Quisnam audeat inutilem esse minusve aptam aetati huic nostrae edicere pietatem illam, quam Decessor Noster imm. mem. Leo XIII esse asseveravit « probatissimam religionis formam »; et in qua validum habendum esse non dubitavit remedium iisdem ipsis medendis malis, quae hodie quoque, ac procul dubio ampliore quodam acrioreque modo, singulos homines ac societatem universam excruciant atque sollicitant? « Haec, aiebat, quam cunctis suademus, cunctis est profutura devotio ». Atque haec monita hortamentaque adiciebat, quae ad Sacratissimi etiam Cordis Iesu cultum spectant: « Hinc vis illa malorum quae iamdiu insident, quaeque vehementer postulant, ut unius auxilium exquiratur, cuius virtute depellantur. Quisnam autem ille sit, praeter Iesum Christum Unigenitum Dei! "Neque enim aliud nomen est sub caelo datum hominibus, in quo oporteat nos salvos fieri".\* Ad illum ergo confugiendum, qui est via, veritas et vita ».<sup>9</sup>

Neque minus probandum minusve aptum profitebatur esse hunc cultum christianae pietati fovendae proximus Decessor Noster fel. rec. Pius XI, qui in Encyclicis datis Litteris scribebat: « In ea ... pietatis forma nonne totius religionis summa atque adeo perfectioris vitae norma continetur, quippe quae et ad Christum Dominum penitus cognoscendum mentes condu-

\* Act. IV, 12.

<sup>9</sup> Enc. *Annum Sacrum*, 25 Maii 1899: *Acta Leonis*, vol. XIX. 1900, pp. 71, 77-78

cat expeditius et ad eundem vehementius diligendum pressiusque imitandum animos inflectat efficacius? »<sup>10</sup> Nobis autem, haud minus quam Decessoribus Nostris, hoc veritatis caput perspectum probatumque est; et cum Summum Pontificatum suscepimus, ac Sacratissimi Cordis Iesu cultum apud christianos populos auspicato auctum esse et quasi triumphantem libentissimo animo vidimus, innumeros ex eodem in universam Ecclesiam permanere fructus salutare gavisi sumus; idque placuit iam in primis Encyclicis Litteris significare.<sup>11</sup> Qui quidem fructus per Nostri Pontificatus annos — non modo aerumnis rerumque angustiis, sed ineffabilibus etiam solaciis plenos — neque numero neque vi pulchritudineque deminuti sunt, sed potius adaucti; varia siquidem incepta feliciter orta sunt ad eundem cultum refovendum conducibilia, et ad nostrorum temporum necessitates quam maxime apta: consociationes dicimus mentis culturae, religioni ac beneficentiae provehendis; scripta typis edita, quae doctrinam de re historica, vel ascetica, vel mystica ad hanc causam pertinentem illustrarent; pia expiationis opera; atque illas nominatim incensissimae pietatis testificationes, quas « Sodalitas ab Apostolatu orationis » edidit, qua praesertim auspice ac faultrice factum est ut domestici convictus, collegia, instituta atque interdum Nationes etiam Sacratissimo Cordi Iesu consecrarentur; quibus quidem haud raro, datis hac de causa litteris, vel orationibus coram habitis, ac vel etiam nuntiis per radiophonicas undas transmissis, paterno animo-gratulati sumus.<sup>12</sup>

Quamobrem, dum cernimus tam uberem salutarium aquarum copiam, hoc est caelestium superni amoris munerum, ex sacro Redemptoris nostri Corde exortam, innumeros Catholicae Ecclesiae filios, Divino afflante operanteque Spiritu, pervadere, facere non possumus quin, Venerabiles Fratres, paterno vos

<sup>10</sup> Enc. *Miserentissimus Redemptor*, 8 Maii 1928: A. A. S. XX, 1928, p. 167.

<sup>11</sup> Cfr. Enc. *Summi Pontificatus*, 20 Octob., 1939: A. A. S. XXXI, 1939, p. 415.

<sup>12</sup> Cfr. A. A. S. XXXII, 1940, p. 276; XXXV, 1943, p. 170; XXXVII, 1945, pp. 263-264; XL, 1948, p. 501; XLI, 1949, p. 331.

animo adhortemur, ut una Nobiscum summas tribuatis laudes gratesque agatis maximas bonorum omnium largitori Deo, haec Apostoli gentium geminantes verba: « Ei autem, qui potens est omnia facere superabundanter quam petimus aut intelligimus, secundum virtutem quae operatur in nobis, ipsi gloria in Ecclesia, et in Christo Iesu, in omnes generationes saeculi saeculorum. Amen ».<sup>13</sup> Sed postquam debitas aeterno Numini persolvimus grates, cupimus vos ac dilectissimos omnes Ecclesiae filios per Encyclicas has Litteras commonere, ut principia illa, quae ex Bibliis ac SS. Patrum et theologorum doctrina oriuntur, intentiore animo consideretis, quibus, quasi solidis fundamentis, Sacratissimi Cordis Iesu cultus innititur. Nobis enim persuasissimum est tum solummodo, cum veritatis divinitus revelatae lumine collustrati primariam altioremque huius cultus naturam penitus inspexerimus, tum solummodo, dicimus, incomparabilem nos posse eius excellentiam eiusque exhaustam numquam caelestium munerum copiam recte pleneque existimare, atque adeo innumera ex eo parta beneficia pie meditantes contemplantesque, itidem posse primum exactum saeculum digne commemorare, ex quo Sacratissimum Cordis Iesu festum in universa Ecclesia celebrandum est.

Eo igitur consilio ducti, ut christifidelium mentibus salutaria praebeamus pascua, quibus enutriti facilius queant veram huius cultus naturam penitus intellegere eiusque uberes percipere fructus, eas Nos Veteris Novique Testamenti paginas explanaturi sumus, quibus reveletur ac proponatur infinita Dei caritas erga hominum genus, quam quidem satis numquam introspicere poterimus; deinde vero earum commentationum, quas Ecclesiae Patres Doctoresque tradiderunt, praecipua lineamenta opportune attingemus; ac postremo Nobis curae erit arctissimum illum nexum in sua luce ponere, qui inter pietatis formam, Divini Redemptoris Cordi tribuendam, et cultum in-

<sup>13</sup> Eph. III, 20-21.

tercedit, qui eius amori ipsiusque Augustae Trinitatis amori debetur erga homines universos. Putamus enim, si modo nobilissimae huius pietatis formae praecipua, quibus eadem nititur, elementa luce illa collustrentur, quae ex Sacris Litteris et ex doctrina a maioribus tradita oritur, facilius christianos posse haurire « aquas in gaudio de fontibus Salvatoris »;<sup>14</sup> hoc est peculiare gravitatis momentum satius existimare, quo cultus Sacratissimi Cordis Iesu pollet in Ecclesiae liturgia et in interna externaque vita actioneque eius; atque adeo posse quoque spirituales eos colligere fructus, quibus singuli queant suos salutariter renovare mores, ut christiani gregis Pastoribus in votis est.

Quo autem rectius omnes possint eam sententiae vim intellegere, qua Veteris Novique Testamenti proponendi eclogarii praestant ad hunc cultum quod attinet, oportet omnino perspectam habeant causam illam, qua Ecclesia cultum latriae tribuit Divini Redemptoris Cordi. Iamvero vobis profecto exploratum est, Venerabiles Fratres, eiusmodi causam duplicem esse. Altera nempe, quae ad cetera quoque pertinet sacrosancta Iesu Christi corporis membra, eo principio innititur, quo novimus eius Cor, utpote nobilissimam humanae naturae partem, Divini Verbi Personae hypostatice coniungi; ideoque eitribuendum esse eundem adorationis cultum, quo Ecclesia Personam ipsius Filii Dei Incarnati honorat. De veritate agitur catholica fide retinenda, cum iam in Oecumenicis Conciliis Ephesino et Constantinopolitano II<sup>15</sup> sollemniter sancita fuerit. Altera vero, quae peculiari modo ad Divini Redemptoris Cor pertinet, ac peculiari itidem ratione postulat latriae cultum eidem tribuendum, ex eo oritur quod Cor eius, magis quam cetera omnia eius corporis membra, immensae eius caritatis erga hominum genus naturalis index seu symbolus est. « Inest

<sup>14</sup> Is. XII, 3.

<sup>15</sup> Conc. Ephes., can. 8; cfr. MANSI, *Sacrorum Conciliorum Ampliss. Collectio*, IV, 1083 C.; Conc. Const. II, can. 9; Cfr. *ibid.* IX, 382 E.



in Sacro Corde, ut Decessor Noster imm. mem. Leo XIII animadvertibat, symbolum atque expressa imago infinitae Iesu Christi caritatis, quae movet ipsa nos ad amandum mutuo ».<sup>16</sup>

Haud dubium profecto est Sacros Libros numquam certam mentionem facere de peculiari venerationis amorisque cultu, physico Incarnati Verbi Cordi habito utpote symbolo incensissimae eius caritatis. Quod profecto si aperte agnoscendum est, non tamen admirationem nobis inicere, neque ullo modo nos ad dubitandum adducere potest divinam erga nos caritatem, quae huius cultus est ratio princeps, cum in Vetere, tum in Novo Testamento talibus imaginibus praedicari atque inculcari, quae animos vehementer commoveant. Quae quidem imagines, quandoquidem in Sacris Litteris iam proponebantur, quae adventum Filii Dei, hominis facti, praenuntiabant, idcirco possunt nobilissimi illius divini amoris signi et indicis auspiciis considerari, hoc est sacratissimi adorandique Cordis Divini Redemptoris.

Ad rem nostram quod attinet, haud necessarium esse putamus multa ex Veteris Testamenti libris proferre, qui veritates divinitus antiquitusque patefactas continent; sed esse satis ducimus in memoriam Foedus illud revocare inter Deum populumque initum pacificisque victimis sacratum — cuius primariam legem duabus tabulis incisam Moyses edidit<sup>17</sup> ac Prophetarum interpretati sunt — pactum fuisse non modo supremi Dei dominii debitaeque hominum oboedientiae vinculis firmatum, sed altioribus etiam amoris rationibus solidatum et alitum. Etenim populo etiam Israel suprema causa obtemperandi Deo non timor divinarum ultionum erat, quem tonitrua et fulgura e Sinai montis vertice coruscantia ac prodeuntia iniciebat animis, sed potius debita erga Deum caritas: « Audi, Israel: Dominus Deus noster, Dominus unus est. Diliges Dominum Deum tuum ex toto corde tuo, et ex tota anima tua, et ex tota

<sup>16</sup> Cfr. Enc. *Annum sacrum: Acta Leonis*, vol. XIX, 1900, p. 76.

<sup>17</sup> Cfr. *Ex.* XXXIV, 27-28.

tercedit, qui eius amori ipsiusque Augustae Trinitatis amori debetur erga homines universos. Putamus enim, si modo nobilissimae huius pietatis formae praecipua, quibus eadem nititur, elementa luce illa collustrentur, quae ex Sacris Litteris et ex doctrina a maioribus tradita oritur, facilius christianos posse haurire « aquas in gaudio de fontibus Salvatoris »;<sup>14</sup> hoc est peculiare gravitatis momentum satius existimare, quo cultus Sacratissimi Cordis Iesu pollet in Ecclesiae liturgia et in interna externaque vita actioneque eius; atque adeo posse quoque spirituales eos colligere fructus, quibus singuli queant suos salutariter renovare mores, ut christiani gregis Pastoribus in votis est.

Quo autem rectius omnes possint eam sententiae vim intellegere, qua Veteris Novique Testamenti proponendi eclogarii praestant ad hunc cultum quod attinet, oportet omnino perspectam habeant causam illam, qua Ecclesia cultum latriae tribuit Divini Redemptoris Cordi. Iamvero vobis profecto exploratum est, Venerabiles Fratres, eiusmodi causam duplicem esse. Altera nempe, quae ad cetera quoque pertinet sacrosancta Iesu Christi corporis membra, eo principio innititur, quo novimus eius Cor, utpote nobilissimam humanae naturae partem, Divini Verbi Personae hypostatice coniungi; ideoque ei tribuendum esse eundem adorationis cultum, quo Ecclesia Personam ipsius Filii Dei Incarnati honorat. De veritate agitur catholica fide retinenda, cum iam in Oecumenicis Conciliis Ephesino et Constantinopolitano II<sup>15</sup> sollemniter sancita fuerit. Altera vero, quae peculiari modo ad Divini Redemptoris Cor pertinet, ac peculiari itidem ratione postulat latriae cultum eidem tribuendum, ex eo oritur quod Cor eius, magis quam cetera omnia eius corporis membra, immensae eius caritatis erga hominum genus naturalis index seu symbolus est. « Inest

<sup>14</sup> Is. XII, 3.

<sup>15</sup> Conc. Ephes., can. 8; cfr. MANSI, *Sacrorum Conciliorum Amplius Collectio*, IV, 1083 C.; Conc. Const. II, can. 9; Cfr. *ibid.* IX, 382 E.

in Sacro Corde, ut Decessor Noster imm. mem. Leo XIII animadvertibat, symbolum atque expressa imago infinitae Iesu Christi caritatis, quae movet ipsa nos ad amandum mutuo ». <sup>16</sup>

Haud dubium profecto est Sacros Libros numquam certam mentionem facere de peculiari venerationis amorisque cultu, physico Incarnati Verbi Cordi habito utpote symbolo incensissimae eius caritatis. Quod profecto si aperte agnoscendum est, non tamen admirationem nobis inicere, neque ullo modo nos ad dubitandum adducere potest divinam erga nos caritatem, quae huius cultus est ratio princeps, cum in Vetere, tum in Novo Testamento talibus imaginibus praedicari atque inculcari, quae animos vehementer commoveant. Quae quidem imagines, quandoquidem in Sacris Litteris iam proponebantur, quae adventum Filii Dei, hominis facti, praenuntiabant, idcirco possunt nobilissimi illius divini amoris signi et indicis auspicium considerari, hoc est sacratissimi adorandique Cordis Divini Redemptoris.

Ad rem nostram quod attinet, haud necessarium esse putamus multa ex Veteris Testamenti libris proferre, qui veritates divinitus antiquitusque patefactas continent; sed esse satis ducimus in memoriam Foedus illud revocare inter Deum populumque initum pacificisque victimis sacratum — cuius primariam legem duabus tabulis incisam Moyses edidit <sup>17</sup> ac Prophetae interpretati sunt — pactum fuisse non modo supremi Dei dominii debitaeque hominum oboedientiae vinculis firmitum, sed altioribus etiam amoris rationibus solidatum et altum. Etenim populo etiam Israel suprema causa obtemperandi Deo non timor divinarum ultionum erat, quem tonitrua et fulgura e Sinai montis vertice coruscantia ac prodeuntia iniciebat animis, sed potius debita erga Deum caritas: « Audi, Israel: Dominus Deus noster, Dominus unus est. Diliges Dominum Deum tuum ex toto corde tuo, et ex tota anima tua, et ex tota

<sup>16</sup> Cfr. Enc. *Annum sacrum: Acta Leonis*, vol. XIX, 1900, p. 76.

<sup>17</sup> Cfr. *Ex.* XXXIV, 27-28.

fortitudine tua. Eruntque verba haec, quae ego praecipio tibi hodie, in corde tuo ».<sup>18</sup>

Haud miramur igitur si Moyses et Prophetæ, quos iure merito Angelicus Doctor Electi Populi « maiores »<sup>19</sup> nominat, cum perspectum haberent totius Legis fundamentum esse in hoc amoris praecepto positum, rationes ac necessitudines omnes, quae inter Deum et Nationem suam intercederent, similitudinibus descripserint ex mutuo patris, filiorum, vel coniugum amore haustis, potius quam severis imaginibus ex supremo Dei dominio, vel ex debita omnium nostrum pavidæque servitute ductis. Itaque, ut exempla afferamus, Moyses ipse, cum celeberrimum suum carmen caneret ob populum ab Aegypti servitute in libertatem vindicatum, cumque significare vellet id ex Dei virtute evenisse, has sententias similitudinesque edidit, quae animum valde commovent: « Sicut aquila provocans ad volandum pullos suos, et super eos volitans, expandit [Deus] alas suas, et assumpsit eum, atque portavit in umeris suis ».<sup>20</sup> At fortasse nullus alius ex sacris vatibus magis quam Oseas tam aperte, tam vehementer exprimit ac pandit amorem, quo Deus nullo non tempore populum suum prosequitur. In huius nempe Prophetæ scriptis, qui inter ceteros minores Prophetas pressae orationis granditate excellit, talem erga Populum Electum Deus profitetur amorem, iustum nempe sancteque sollicitum, qualis est amor patris misericordis et amantis, vel sponsi, cuius honor offenditur. De caritate agitur, quae tantum abest ut imminuatur vel deficiat ob proditorum perfidiam atque immania scelera, ut potius eadem pro merito quidem puniat, sed illa tantum de causa ut abalienatam infidamque sponsam atque ingratos filios, — nedum repudiet ac dimittat — expiet, purificet, ac renovatis confirmatisque amoris nexibus secum iterum coniungat: « Quia puer Israel, et dilexi eum; et ex Aegypto vocavi filium meum...

<sup>18</sup> Deut. VI, 4-6.

<sup>19</sup> Sum. Theol., II-II, q. 2, a. 7: ed. Leon., tom. VIII, 1895. p. 34.

<sup>20</sup> Deut. XXXII, 11.



Et ego quasi nutritius Ephraim; portabam eos in brachiis meis, et nescierunt quod curarem eos. In funiculis Adam traham eos, in vinculis caritatis... Sanabo contritiones eorum, diligam eos spontanee, quia aversus est furor meus ab eis. Ero quasi ros; Israel germinabit sicut lilium, et erumpet radix eius ut Libani ».<sup>21</sup>

Haud dissimiles sententias effert Isaias Propheta, cum Deum ipsum ac Populum Electum quasi inter se hisce contrariis verbis colloquentes inducit: « Et dixit Sion: Dereliquit me Dominus, et Dominus oblitus est mei. Numquid oblivisci potest mulier infantem suum, ut non misereatur filio uteri sui? Et si illa oblita fuerit, ego tamen non obliviscar tui ».<sup>22</sup> Neque minus animos commovent verba, quibus Cantici Canticorum auctor, coniugalis amoris imaginibus usus, mutuae caritatis vincula significanter describit, quibus Deus et ab eo dilecta Natio invicem coniunguntur: « Sicut lilium inter spinas, sic amica mea inter filias. ... Ego dilecto meo, et dilectus meus mihi, qui pascitur inter lilia. ... Pone me ut signaculum super cor tuum, ut signaculum super brachium tuum, quia fortis est ut mors dilectio, dura sicut infernus aemulatio: lampades eius lampades ignis atque flammarum ».<sup>23</sup>

Verumtamen tenerrimus hic, indulgens et patiens amor Dei, qui quamvis populum Israel sceleribus scelera adicientem dedignetur, eum nihilo secius omnino numquam repudiat, vehemens utique elatusque videtur, sed praenuntians tantummodo auspiciu fuit incensissimae illius caritatis, quam promissus hominibus Redemptor ex amantissimo Corde suo ad omnes pansurus erat, et quae dilectionis nostrae exemplar ac Novi Foederis fundamentum futura erat. Verum enim vero is tantum, qui Unigena Patris et Verbum caro factum « plenum gratiae et veritatis »<sup>24</sup> est, cum ad homines venisset peccatis innumeris

<sup>21</sup> Os. XI, 1. 3-4; XIV, 5-6.

<sup>22</sup> Is. XLIX, 14-15.

<sup>23</sup> Cant. II, 2; VI, 2; VIII, 6.

<sup>24</sup> Ioan. I, 14.

miseriisque oppressos, ex humana natura sua hypostatice cum Divina Persona coniuncta, humano generi potuit « fontem aquae vivae » aperire, quae aridam irrigaret terram uberrime, eamque florens fructuosumque viridarium efficeret. Quam quidem rem prorsus mirandam ob misericordissimum aeternumque Dei amorem eventuram esse iam hisce verbis quodammodo praeannuntiare videtur Ieremias Propheta: « In caritate perpetua dilexi te; ideo attraxi te, miserans ... Ecce dies venient, dicit Dominus, et feriam Domui Israel et Domui Iuda foedus novum. ... Hoc erit pactum, quod feriam cum Domo Israel post dies illos, dicit Dominus: Dabo legem meam in visceribus eorum, et in corde eorum scribam eam, et ero eis in Deum, et ipsi erunt mihi in populum ...; quia propitiabor iniquitati eorum, et peccati eorum non memorabor amplius ».<sup>25</sup>

## II

Attamen ex Evangeliiis solummodo certum exploratumque habemus Novum Foedus inter Deum hominesque initum — cuius quidem pactum illud, quod Moyses inter populum Israel Deumque pepigerat, nihil aliud erat nisi symbolus et index, quem Ieremias praeannuntiaverat Propheta — Novum Foedus dicimus id ipsum reapse esse, quod Incarnati Verbi opera, divinae gratiae conciliatrice, statutum effectumque est. Hoc Foedus incomparabili modo nobilius ac firmiter idcirco habendum est, quod non, ut prius, hircorum et vitulorum sanguine, sed sacrosancto illius cruore sancitum est, quem eadem pacifica animalia rationis expertia iam praeannuntiaverant: « Agnum Dei, qui tollit peccatum mundi ».<sup>26</sup> Etenim Christianum Foedus, multo magis quam antiquum, pactum se aperte demonstrat non servitute, non timore innixum, sed amicitia illa sancitum,

<sup>25</sup> IER. XXXI, 3; 31. 33-34.

<sup>26</sup> Cfr. IOAN. I, 29; *Hebr.* IX, 18-28; X, 1-17.

quae inter patrem et filios intercedat oportet, ac munificentiore divinae gratiae veritatisque effusione alitum ac roboratum, secundum illud Ioannis Evangelistae effatum: « Et de plenitudine eius nos omnes accepimus, et gratiam pro gratia. Quia lex per Moysen data est, gratia et veritas per Iesum Christum facta est ».<sup>27</sup>

Qua quidem illius discipuli sententia, « quem diligebat Iesus, qui et recubuit in cena super pectus eius »,<sup>28</sup> cum in ipsum mysterium infinitae Incarnati Verbi caritatis inducti simus, dignum, iustum, aequum et salutare esse videtur, Venerabiles Fratres, in suavissima eiusdem mysterii contemplatione aliquantisper immorari, ut luce illa collustrati, quae ex Evangelio repercussa idem mysterium illuminat, nos quoque possimus id assequi et efficere votum, de quo gentium Apostolus ad Ephesios scribens loquitur: « Christum habitare per fidem in cordibus vestris, in caritate radicati et fundati, ut possitis comprehendere cum omnibus Sanctis quae sit latitudo, et longitudo, et sublimitas, et profundum; scire etiam supereminentem scientiae caritatem Christi, ut impleamini in omnem plenitudinem Dei ».<sup>29</sup>

Divinae Redemptionis Mysterium primaria ac naturali ratione mysterium amoris est: hoc est iusti amoris Christi erga caelestem Patrem, cui sacrificium Crucis, amanti oboedientique animo oblatum, uberrimam infinitamque satisfactionem defert ob culpas humani generis debitam: « Christus, ex caritate et oboedientia patiende, maius aliquid Deo exhibuit quam exigeret recompensatio totius offensae humani generis ».<sup>30</sup> Est praeterea mysterium misericordis amoris Augustae Trinitatis Divinique Redemptoris erga homines universos, qui quidem cum ad sua expianda scelera satis nullo modo valerent,<sup>31</sup> Christus

<sup>27</sup> IOAN. I, 16-17.

<sup>28</sup> IOAN. XXI, 20.

<sup>29</sup> Eph. III, 17-19.

<sup>30</sup> Sum. Theol., III, q. 48, a. 2: ed. Leon., tom. XI, 1903, p. 464.

<sup>31</sup> Cfr. Enc. *Miserentissimus Redemptor*: A. A. S. XX, 1928, p. 170.

per haud investigabiles meritorum divitias, quas, pretiosissimo suo effuso sanguine, nobis acquisivit, illud amicitiae pactum inter Deum hominesque redintegrare ac perficere potuit, quod primum in terrestri Paradiso ob miserandum Adae casum, deinde vero ob innumera Populi Electi peccata violatum fuerat. Itaque Divinus Redemptor — utpote legitimus perfectusque Mediator noster — cum, pro incensissima sua erga nos caritate, humani generis officia ac debita omnino divinis conciliaret iuribus, auctor profecto fuit ut miranda illa inter divinam iustitiam divinamque misericordiam conciliatio haberetur, quae salutis nostrae mysterium omnia prorsus transcendens constituit, de quo sapienter hisce verbis loquitur Angelicus Doctor: « Dicendum quod hominem liberari per passionem Christi, conveniens fuit et misericordiae et iustitiae eius. Iustitiae quidem, quia per passionem suam Christus satisfecit pro peccato humani generis: et ita homo per iustitiam Christi liberatus est. Misericordiae vero, quia, cum homo per se satisfacere non posset pro peccato totius humanae naturae, Deus ei satisfactorem dedit Filium suum. Et hoc fuit abundantioris misericordiae, quam si peccata absque satisfactione dimisisset. Unde dicitur: "Deus, qui dives est in misericordia, propter nimiam caritatem suam, qua dilexit nos, cum essemus mortui peccatis, convivificavit nos in Christo" ».<sup>32</sup>

Ut tamen reapse possimus, quatenus mortalibus licet, « comprehendere cum omnibus sanctis quae sit latitudo, et longitudo, et sublimitas, et profundum »<sup>33</sup> arcanae caritatis Incarnati Verbi erga caelestem Patrem hominesque peccatorum labe infectos, animadvertere oportet eius amorem non tantummodo spiritualement fuisse, ut Deum addecet, quatenus « Spiritus est Deus ».<sup>34</sup> Utique huius naturae fuit amor, quo Deus progenitores nostros Hebraeorumque populum dilexit; atque adeo humani,

<sup>32</sup> Eph. II, 4; Sum. Theol., III, q. 46, a. 1 ad 3: ed. Leon., tom. XI, 1903, p. 436.

<sup>33</sup> Eph. III, 18.

<sup>34</sup> IOAN. IV, 24.



familiaris paternique amoris dictiones, quæ in Psalmis, in Prophetarum scriptis, et in Cantico Canticorum leguntur, indices sunt significationesque verissimæ sed spiritualis prorsus caritatis, qua Deus hominum genus prosequabatur; cum contra qui spirat ex Evangelio, ex Apostolorum litteris et ex Apocalypsis paginis amor, quæ quidem Cordis Iesu Christi amorem describunt, non divinam solummodo caritatem, sed humanos etiam dilectionis sensus significat; quod profecto iis omnibus, qui catholico censentur nomine, certissimum est. Etenim Dei Verbum non ficticium inaneque corpus assumpsit, ut iam primo christiani nominis saeculo nonnulli hæretici asseverarunt, gravissimis hisce verbis a Ioanne Apostolo improbat: « Quoniam multi seductores exierunt in mundum, qui non confitentur Iesum Christum venisse in carnem: hic est seductor et antichristus »;<sup>35</sup> sed reapse humanam naturam, individuum, integram et perfectam, quæ in purissimo Mariæ Virginis sinu ex Spiritus Sancti virtute concepta est,<sup>36</sup> divinae Personae suae coniunxit. Nihil igitur ei defuit humanæ naturæ, quam sibi Dei Verbum copulavit; eam ipse profecto assumpsit nullo modo imminutam, nullo modo immutatam ad spiritualia et ad corporea quod attinet: hoc est intelligentia ac voluntate ditatam ceterisque internis externisque cognoscendi facultatibus, itemque sensuum appetitu omnibusque naturalibus impulsionibus. Haec omnia Catholica docet Ecclesia utpote a Romanis Pontificibus et ab Oecumenicis Conciliis sollemniter sancita confirmataque: « Totus in suis, totus in nostris »;<sup>37</sup> « perfectus in deitate et idem perfectus in humanitate »;<sup>38</sup> « totus Deus homo, et totus homo Deus ».<sup>39</sup>

Quapropter cum nullo modo dubitari possit Iesum Christum

<sup>35</sup> II Ioan. 7.

<sup>36</sup> Cfr. LUC. I, 35.

<sup>37</sup> S. LEO MAGNUS, *Epist. dogm.* « *Lectis dilectionis tuæ* » ad Flavianum Const. Patr., 13 Iun., a. 449; cfr. P. L. LIV, 763.

<sup>38</sup> Conc. Chalced., a. 451; cfr. MANSI, *Op. cit.* VII, 115 B.

<sup>39</sup> S. GELASIUS PAPA, Tract. III: « *Necessarium* » de duabus naturis in Christo, cfr. A. THIEL, *Epist. Rom. Pont. a S. Hilario usque ad Pelagium II*, p. 532.

verum adeptum esse corpus, omnibus, qui eidem proprii sunt, affectibus pollens, in quibus quidem ceteris omnibus amor prae-  
stat, nullum pari modo dubium esse potest eum physico no-  
stroque simili corde praeditum fuisse, cum sine excellentissimo  
hoc corporis membro, hominum vita, ad affectus etiam quod  
attinet, haberi non possit. Quamobrem Iesu Christi Cor, Divinae  
Verbi Personae hypostatice unitum, ob amorem etiam et ob  
ceteras affectuum impulsiones procul dubio palpitavit, quae  
tamen et cum humana voluntate, divinae caritatis plena, et  
cum ipso infinito amore, quem Filius cum Patre et cum Spiritu  
Sancto communicat, ita congruebant omnino et consonabant,  
ut numquam hos inter tres amores aliquid esset contrarium  
vel dissonans.<sup>40</sup>

Verumtamen Dei Verbum veram perfectamque naturam  
humanam assumpsisse sibi, et carneum sibi effinxisse confor-  
mavisseque cor, quod, haud minus quam nostrum, posset per-  
peti ac transfigi, id, dicimus, nisi in ea luce ponatur et consi-  
deretur, quae non modo ex unione hypostatica et substantiali  
elicitur, sed in ea etiam luce, quae ex humana Redemptione  
quasi eius complemento oritur, scandalo profecto ac stultitiae  
aliquibus esse potest, ut Christus cruci fixus reapse fuit Iudaeo-  
rum et ethnicorum genti.<sup>41</sup> Legitima enim catholicae fidei do-  
cumenta, cum Sacris Litteris omnino consonantia, nobis asse-  
verant Unigenam Dei Filium humanam naturam patibilem ac  
mortalem assumpsisse ea potissimum de causa, quod cruentum  
sacrificium e cruce pendens offerre cuperet, ut humanae sa-  
lutis operam consummaret. Quod ceteroquin gentium Apostolus  
hisce conceptis verbis edocet: « Qui enim sanctificat, et qui  
sanctificantur, ex uno omnes. Propter quam causam non con-  
funditur fratres eos vocare, dicens: Nuntiabo nomen tuum fra-  
tribus meis ... Et iterum: Ecce ego et pueri mei, quos dedit

<sup>40</sup> Cfr. S. THOM., *Sum. Theol.*, III, q. 15, a. 4; q. 18, a. 6: ed. Leon., tom. XI, 1903, p. 189 et 237.

<sup>41</sup> Cfr. *I Cor.* I, 23.

mihi Deus. Quia ergo pueri communicaverunt carni et sanguini, et ipse similiter participavit eisdem. ... Unde debuit per omnia fratribus similari, ut misericors fieret, et fidelis pontifex ad Deum, ut repropitiaret delicta populi. In eo in quo passus est ipse et tentatus, potens est et eis qui tentantur auxiliari». <sup>42</sup>

Ac Sancti Patres, doctrinae divinitus patefactae veridici testes, illud optime animadverterunt, quod iam Paulus Apostolus clare satis asseruerat, divini nempe amoris mysterium cum Incarnationis, tum Redemptionis veluti principium esse ac verticem. Etenim saepe luculenterque in eorum scriptis legitur Iesum Christum idcirco perfectam humanam naturam et caducum fragileque corpus nostrum assumpsisse, ut sempiternae consuleret saluti nostrae, nobisque infinitum amorem suum, sensibilem etiam, apertissime manifestaret ac panderet.

S. Iustinus, quasi Apostoli gentium voci resonans, haec scribit: «Natum enim ex ingenito et ineffabili Deo, Verbum adoramus et amamus; quandoquidem propter nos homo factus est, ut passionum nostrarum particeps factus medicinam illis faceret». <sup>43</sup> Ac S. Basilius, in tribus Cappadociae Patribus primus, veros simulque sanctos fuisse asseverat sensuum affectus in Christo: «Liquet Dominum naturales quidem affectus suscepisse ad confirmationem verae nec phantasticae incarnationis; vitiosos vero affectus, qui nostrae vitae puritatem coinquant, ut incontaminata divinitate indignos reiecisce». <sup>44</sup> Parique modo Antiochenae Ecclesiae lumen, S. Ioannes Chrysostomus fatetur sensuum motus, quibus Divinus Redemptor obnoxius erat, clare patefecisse omnino integram eum humanam assumpsisse naturam: «Si enim nostrae non fuisset naturae, non a luctu semel et iterum correptus fuisset». <sup>45</sup> In Latinis autem Patribus eos libet memorare, quos hodie Ecclesia utpote maximos Doctores veneratur. Itaque S. Ambrosius sensibiles

<sup>42</sup> *Hebr.* II, 11-14; 17-18.

<sup>43</sup> *Apol.* II, 13; *P. G.* VI, 465.

<sup>44</sup> *Epist.* 261, 3; *P. G.* XXXII, 972.

<sup>45</sup> *In Ioann.*, Homil. 63, 2; *P. G.* LIX, 350.

commotiones et affectus, quorum Incarnatum Dei Verbum expers non fuit, ex hypostatica unione, quasi ex naturali principio oriri testatur: « Et ideo quia suscepit animam, suscepit et animae passiones; non enim Deus, eo quod Deus erat, aut turbari, aut mori potuisset ».<sup>46</sup> Quibus quidem ex affectionibus S. Hieronymus praecipuum argumentum eruit Christum reapse humanam assumpsisse naturam: Dominus noster, ut veritatem assumpti probaret hominis, vere quidem contristatus est.<sup>47</sup> Sanctus autem Augustinus peculiari modo rationes illas animadvertit, quae inter Incarnati Verbi affectiones intercedunt humanaeque Redemptionis finem: « Hos autem humanae infirmitatis affectus, sicut ipsam carnem infirmitatis humanae, ac mortem carnis humanae Dominus Iesus, non conditionis necessitate, sed miserationis voluntate suscepit, ut transfiguraret in se corpus suum, quod est Ecclesia, cui caput esse dignatus est, hoc est, membra sua in sanctis et fidelibus suis; ut si cui eorum inter humanas tentationes contristari et dolere contingeret, non ideo se ab eius gratia putaret alienum; et non esse ista peccata, sed humanae infirmitatis indicia, tamquam voci praemissae concinens chorus, ita corpus eius ex ipso suo capite addisceret ».<sup>48</sup> Pressius, sed haud minus efficaciter hi, qui sequuntur, S. Ioannis Damasceni loci Ecclesiae doctrinam manifestam praeferunt: « Totum quippe me totus assumpsit, ac totus toti unitus est, ut toti salutem afferret. Nam alioquin non potuit sanari, quod assumptum non fuit ».<sup>49</sup> « Omnia igitur assumpsit, ut omnia sanctificaret ».<sup>50</sup>

Animadvertendum tamen est hos Sacrarum Litterarum Patrumque eclogarios, hisque similes non paucos quos non retulimus, quamvis luculenter testentur Iesum Christum sensuum commotionibus affectibusque fuisse praeditum, atque

<sup>46</sup> *De pde ad Gratianum*, II, 7, 56: P. L. XVI, 594.

<sup>47</sup> *Cfr. Super Matth.* XXVI, 37: P. L. XXVI, 205.

<sup>48</sup> *Enarr. in Ps. LXXXVII*, 3: P. L. XXXVII, 1111.

<sup>49</sup> *De Fide Orth.* III, 6: P. G. XCIV, 1006.

<sup>50</sup> *Ibid.* III, 20: P. G. XCIV, 1081.

idcirco humanam assumpsisse naturam ut sempiternae nostrae consuleret saluti, nihilo secius numquam hos eosdem affectus ad physicum cor eius ita referre, ut illud infiniti amoris eius symbolum aperte indicent. Atsi Evangelistae ceterique sacri scriptores Redemptoris nostri cor, vivax ac sentiendi facultate haud minus quam nostrum praeditum, et ob varios animi motus et affectus duplicisque voluntatis eius caritatem flagrantissimam, palpitans et micans manifesto non describunt, nihilo minus divinum eius amorem ac sensuum commotiones, quae cum eo coniunguntur, saepe in sua luce ponunt: hoc est desiderium, laetitiam, aegritudinem, timorem et iram, prouti ex eius ore, verbis, gestu manifestantur. Adorandi Servatoris nostri vultus praesertim index ac veluti speculum fidelissimum profecto fuit eorum affectuum, qui cum animum vario modo commoverent, quasi reciprocantes undae sanctissimum Cor eius attingebant ac pulsando excitabant. Etenim hanc etiam ad rem id valet, quod de humana psychologia et de iis quae inde consequuntur, Angelicus Doctor, communi experientia edoctus, animadvertit: « Perturbatio irae usque ad exteriora membra perducitur; et maxime ad illa membra in quibus expressius relucet vestigium cordis, sicut in oculis et in facie et in lingua ».<sup>51</sup>

Quamobrem iure meritoque Incarnati Verbi Cor praecipuus consideratur index et symbolus triplicis illius amoris, quo Divinus Redemptor Aeternum Patrem hominesque universos continenter adamat. Symbolus nempe est divini illius amoris, quem cum Patre et Spiritu Sancto communicat, sed qui tamen in ipso tantum, utpote in Verbo, quod caro factum est, per caducum et fragile humanum corpus nobis manifestatur, quandoquidem « in ipso inhabitat omnis plenitudo divinitatis corporaliter ».<sup>52</sup> Symbolus praeterea est incensissimae illius caritatis, quae, eius in animum infusa, humanam ditat Christi

<sup>51</sup> *Sum. Theol.*, I-II, q. 48, a. 4: ed. Leon., tom. VI, 1891, p. 306.

<sup>52</sup> *Col.* II, 9.



voluntatem, et cuius actus duplici scientia perfectissima collustratur et dirigitur, hoc est beata et indita vel infusa.<sup>53</sup> Ac denique — idque modo magis naturali ac directo — sensibilis quoque affectus symbolus est, cum Iesu Christi corpus, in sinu Virginis Mariae Spiritus Sancti opera formatum, sentiendi percipiendique vi polleat perfectissima, magis utique quam cetera omnia hominum corpora.<sup>54</sup>

Cum nos igitur Sacra Eloquia et legitima catholicae fidei documenta edoceant in sanctissimo Iesu Christi animo summam omnium vigere convenientiam et concordiam, eumque ad Redemptionis nostrae finem assequendum triplicem amorem suum manifesto direxisse, idcirco patet meritissimo nos posse Divini Redemptoris Cor utpote significantem caritatis eius imaginem, Redemptionisque nostrae testem contemplari ac venerari, itemque mysticam veluti scalam, qua ad amplexum ascendamus « Salvatoris nostri Dei ».<sup>55</sup> Quamobrem eius verba, actus, praecepta, rerum miracula, peculiarique modo opera illa, quae luculentius caritatem eius erga nos testantur — ut divinam institutam Eucharistiam, ut acerrimos eius cruciatus eiusque mortem, ut nobis benigne concessam Sanctissimam eius Matrem, ut Ecclesiam pro nobis conditam, ac denique Spiritum Sanctum in Apostolos et in nos missum — haec, dicimus, omnia admirerur oportet veluti triplicis eius amoris documenta; itemque oportet eius Sacratissimi Cordis pulsus amantissimo meditemur animo, quibus terrenae peregrinationis tempus ipse quasi metiri visus est, usque ad supremum momentum illud, quo, ut Evangelistae testantur, « clamans voce magna dixit: Consummatum est. Et inclinato capite, tradidit spiritum ».<sup>56</sup> Tum eius Cordis palpitatio constitit ac desiit, eiusque sensibilis amor intermissus est usque dum ipse, triumphata morte, e sepulcro resurrexit.

<sup>53</sup> Cfr. *Sum. Theol.*, III, q. 9, aa. 1-3: ed. Leon., tom. XI, 1903, p. 142.

<sup>54</sup> Cfr. *Ibid.*, III, q. 33, a. 2, ad 3<sup>m</sup>; q. 46, a. 6: ed. Leon., tom. XI, 1903<sup>5</sup> pp. 342, 433.

<sup>55</sup> *Tit.* III, 4.

<sup>56</sup> *MATTH.* XXVII, 50; *IOAN.* XIX, 30.

Postquam autem eius corpus, sempiternae gloriae statum adeptum, Divini Redemptoris animo, mortis victoris, iterum coniunctum est, Cor eius Sacratissimum imperturbabili ac placido pulsu moveri numquam destitit nec desistet, eiusque triplicem amorem significare numquam pariter desinet, quo Dei Filius cum suo caelesti Patre devincitur et cum hominum communitate universa, cuius ipse pleno iure mysticum est caput.

### III

Nunc vero, Venerabiles Fratres, ut ex piis hisce considerationibus uberes possimus salutaesque colligere fructus aliquantisper meditari ac contemplari libet multiplices Servatoris nostri Iesu Christi humanos divinosque affectus, quos quidem eius Cor per mortalis vitae cursum participando rettulit, ac nunc refert, aeternumque per aevum referet. Ex Evangelii praesertim paginis lux nobis affulget, qua collustrati ac roborati divini huius Cordis sacrarium ingredi possumus, unaque cum Apostolo gentium admirari « abundantes divitias gratiae [Dei] in bonitate super nos in Christo Iesu ».<sup>57</sup>

Una cum humano ac divino pulsatur amore adorandum Iesu Christi Cor, postquam Maria Virgo magnanimum illud verbum « Fiat » pronuntiavit, ac Dei Verbum, ut animadvertit Apostolus: « ingrediens mundum dicit: Hostiam et oblationem noluisti, corpus autem aptasti mihi; holocaustomata pro peccato non tibi placuerunt. Tunc dixi: Ecce venio; in capite libri scriptum est de me ut faciam, Deus, voluntatem tuam. ... In qua voluntate sanctificati sumus per oblationem corporis Christi semel ».<sup>58</sup> Amore itidem commovebatur, humanae suae voluntatis affectibus divinoque amori concordissimo, cum in Nazarethana domo caelestia conserebat colloquia cum dulcissima

<sup>57</sup> Eph. II, 7.

<sup>58</sup> Hebr. X, 5-7. 10.

Matre sua, et cum Iosepho putativo patre, cui oboediens laboriosam praestabat operam in tignariorum fabrorum arte. Ac triplici illo, de quo diximus, amore exercebatur in diuturnis suis apostolicis peregrinationibus habendis; in innumeris parandis miraculis, quibus vel mortuos ab inferis evocabat, vel omne genus aegrotis sanitatem impertiebat; in exantlandis laboribus; in sudore, fame, siti toleranda; in nocturnis vigiliis, quibus caelestem Patrem amantissime precabatur; in orationibus denique habendis et in parabolis proponendis explicandisque; illis nominatim, quae de misericordia agunt, ut de drachmate deperdito, de amissa ove, et de prodigo filio; quibus quidem in rebus et verbis, ut Gregorius Magnus animadvertit, ipsum Dei Cor manifestatur: « Disce Cor Dei in verbis Dei, ut ardentius ad aeterna suspires ».<sup>59</sup>

Impensiore autem caritate Iesu Christi Cor permovebatur, cum ex ore eius verba eliciebantur incensissimum amorem spirantia. Ita, ut exempla proponamus, cum turbas defatigatas fameque affectas cerneret, exclamabat: « Misereor super turbam »;<sup>60</sup> et cum Ierusalem dilectissimam urbem suam peccatis obcaecatam prospiceret, ideoque extremae destinatae ruinae, hoc effatum edebat: « Ierusalem, Ierusalem, quae occidis prophetas et lapidas eos qui ad te missi sunt, quoties volui congregare filios tuos, quemadmodum gallina congregat pullos suos sub alas, et noluisti! »<sup>61</sup> Ob amorem autem erga Patrem suum, et ob sanctam indignationem palpitavit Cor eius, cum vidit sacrilegum commercium in Templo fieri, cuius violatores hisce verbis increpavit: « Scriptum est: Domus mea domus orationis vocabitur; vos autem fecistis illam speluncam latronum ».<sup>62</sup>

At peculiari amore pavoreque commotum est Cor eius cum acerrimorum cruciatuum horam iam imminere prospexit, ac naturali motu ingruentibus doloribus ac morti repugnans, ex-

<sup>59</sup> *Registr. epist.*, lib. IV, ep. 31 ad *Theodorum medicum*: P. L. LXXXVII, 706.

<sup>60</sup> MARC. VIII, 2.

<sup>61</sup> MATTH. XXIII, 37.

<sup>62</sup> MATTH. XXI, 13.

clamavit: « Pater mi, si possibile est, transeat a me calix iste »;<sup>63</sup> invicto autem amore summaque aegritudine, cum a proditore osculo exceptus, hisce verbis eum allocutus est, quae extremum videntur misericordissimi Cordis eius invitamentum amico datum, qui impio, foedifrago obstinatissimoque animo eum carnificibus traditurus erat: « Amice, ad quid venisti? Osculo Filium hominis tradis? »;<sup>64</sup> miseratione vero amoreque impensissimo, cum piis mulieribus sibi illacrimantibus, immeritum crucis supplicium subituro, dixit: « Filiae Ierusalem, nolite flere super me, sed super vos ipsas flete, et super filios vestros ...; quia si in viridi ligno haec faciunt, in arido quid fiet? »<sup>65</sup>

Ac tandem Divinus Redemptor, ex cruce pendens, Cor suum sensit variis vehementibusque aestuare affectibus, hoc est amoris flagrantissimi, consternationis, misericordiae, incensissimi desiderii, serенаeque requietis; quos quidem affectus haec effata significanter indicant: « Pater, dimitte illis; non enim sciunt quid faciunt »;<sup>66</sup> « Deus meus, Deus meus, ut quid dereliquisti me? »;<sup>67</sup> « Amen dico tibi, hodie mecum eris in Paradiso »;<sup>68</sup> « Sitio »;<sup>69</sup> « Pater, in manus tuas commendo spiritum meum ».<sup>70</sup>

Quisnam vero queat illos Divini Cordis pulsus, infiniti eius amoris indices, digne describere, quos iis temporis momentis edidit, cum maxima dona hominibus impertiit: hoc est semet ipsum in Eucharistiae Sacramento, Sanctissimam Matrem suam, ac sacerdotale nobiscum communicatum munus?

Etiam antequam Ultimam Cenam cum discipulis suis manducaret, Christus Dominus, cum nosceret se instituturum esse

<sup>63</sup> MATTH. XXVI, 39.

<sup>64</sup> MATTH. XXVI, 50; LUC. XXII, 48.

<sup>65</sup> LUC. XXIII, 28. 31.

<sup>66</sup> LUC. XXIII, 34.

<sup>67</sup> MATTH. XXVII, 46.

<sup>68</sup> LUC. XXIII, 43.

<sup>69</sup> IOAN. XIX, 28.

<sup>70</sup> LUC. XXIII, 46.

Sacramentum Corporis et Sanguinis sui, cuius effusione Novum Foedus consecrandum erat, Cor suum senserat vehementibus excitari motibus, quos Apostolis hisce verbis significavit: « Desiderio desideravi hoc pascha manducare vobiscum, antequam patiar »;<sup>71</sup> qui quidem motus vehementiores etiam procul dubio fuere, cum « accepto pane, gratias egit, et fregit, et dedit eis dicens: Hoc est Corpus meum, quod pro vobis datur, hoc facite in meam commemorationem. Similiter et calicem, postquam cenavit, dicens: Hic est calix novum testamentum in Sanguine meo, qui pro vobis fundetur ».<sup>72</sup>

Merito igitur asseverari potest divinam Eucharistiam, utpote Sacramentum et Sacrificium, quorum alterum hominibus impertit, alterum vero ipsemet perpetuo immolat « ab ortu solis usque ad occasum », <sup>73</sup> itemque sacerdotium dona profecto esse Sacratissimi Cordis Iesu.

Cuius quidem Sacratissimi Cordis pretiosissimum quoque donum est, ut diximus, Maria Dei Mater alma, nostrumque omnium amantissima Mater. Quae enim Redemptoris nostri Genetrix fuit secundum carnem, eiusque socia in Hevae filiis revocandis ad divinae gratiae vitam, ea merito fuit totius humani generis spiritualis salutata Mater. Quam ad rem S. Augustinus de ea scribit: « Plane mater membrorum Salvatoris, quod nos sumus quia cooperata est caritate, ut fideles in Ecclesia nascerentur qui illius capitis membra sunt ».<sup>74</sup>

Atque incruento sui ipsius dono, sub specie panis et vini, Servator noster Iesus Christus adiungere voluit, tamquam praecipuum documentum intimae infinitaeque caritatis suae, cruentum Crucis Sacrificium. Qua quidem agendi ratione exemplum prae-buit excelsae illius caritatis, quam quasi summam amoris metam discipulis suis proposuerat hisce verbis: « Maiorem hac dilectionem nemo habet, ut animam suam ponat quis pro ami-

<sup>71</sup> LUC. XXII, 15.

<sup>72</sup> LUC. XXII, 19-20.

<sup>73</sup> MAL. I, 11.

<sup>74</sup> De sancta virginitate, VI: P. L. XL, 399.



cis suis ».<sup>75</sup> Quamobrem Iesu Christi Filii Dei amor, per Golgothae Sacrificium, Dei ipsius amorem luculenter significanterque patefacit: « In hoc cognoscimus caritatem Dei, quoniam ille animam suam pro nobis posuit; et nos debemus pro fratribus animam ponere ».<sup>76</sup> Ac reapse Divinus Redemptor noster amore magis quam vi carnificum Cruci affixus est; eiusque voluntarium holocaustum supremum donum est, quod singulis hominibus impertiit secundum pressam illam Apostoli sententiam: « Dilexit me, et tradidit semetipsum pro me ».<sup>77</sup>

Nullum igitur dubium esse potest sacratissimum Cor Iesu, cum sit, intima prorsus ratione, Incarnati Verbi vitae particeps, atque adeo veluti Divinitatis instrumentum assumptum fuerit, haud minus quam cetera humanae naturae membra, in divinae gratiae divinaeque omnipotentiae operibus exsequendis,<sup>78</sup> legitimum etiam immensae illius caritatis symbolum esse, qua per motus Servator noster per suum profusum Sanguinem mysticum cum Ecclesia inivit matrimonium: « Per caritatem pro Ecclesia sibi in sponsam coniungenda passus est ».<sup>79</sup> Ex vulnerato igitur Redemptoris Corde Ecclesia, utpote Redemptionis Sanguinis administra, nata est, ex eodemque Sacramentorum gratia, ex qua Ecclesiae filii supernam vitam hauriunt, uberime profluxit, ut in sacra Liturgia legimus: « Ex Corde scisso Ecclesia Christo iugata nascitur. ... Qui Corde fundis gratiam ».<sup>80</sup> De huius symboli ratione, quae ne antiquis quidem Patribus scriptoribusque ecclesiasticis ignota erat, Doctor Communis, quasi eorundem vocibus resonans, haec scribit: « Ex latere Christi fluxit aqua ad abluendum, sanguis autem ad redimendum. Et ideo sanguis competit sacramento Eucharistiae, aqua autem sacramento Baptismi; qui tamen habet vim

<sup>75</sup> IOAN. XV, 13.

<sup>76</sup> I Ioan. III, 16.

<sup>77</sup> Gal. II, 20.

<sup>78</sup> Cfr. S. THOM., *Sum. Theol.*, III, q. 19, a. 1: ed. Leon., tom. XI, 1903, p. 329.

<sup>79</sup> *Sum. Theol., Suppl.*, q. 42, a. 1 ad 3<sup>m</sup>: ed. Leon., tom. XII, 1906, p. 81.

<sup>80</sup> Hymn. ad Vesp. Festi Ss̃mi Cordis Iesu.

ablutivam ex virtute sanguinis Christi ». <sup>81</sup> Quod heic de latere Christi scribitur, a milite vulnerato et aperto, idem de Corde eius dicendum est quod profecto lancea suo ictu attigit, quandoquidem miles ea de causa eam vibraverat, ut de Iesu Christi cruci fixi morte certo modo constaret. Quamobrem Sacratissimi Cordis Iesu vulnus, iam mortali hac vita functi, per saeculorum decursum vivida imago est illius caritatis sponte editae, qua Deus Unigenam suum hominibus redimendis dedit, et qua Christus nos omnes tam vehementer adamavit ut semet ipsum pro nobis in Calvariae loco cruentam hostiam immolaret: « Christus dilexit nos, et tradidit semetipsum pro nobis oblationem et hostiam Deo in odorem suavitatis ». <sup>82</sup>

Postquam Servator noster ad caelum ascendit una cum corpore aeternae gloriae spendoribus ornato, seditque ad dexteram Patris, flagrantissimo amore, quo etiam Cor eius palpitat, Ecclesiam suam sponsam prosequi non desiit. In manibus siquidem, in pedibus et in latere fulgentia vulnerum signa praefert, quae triplicem ab se adeptam victoriam repraesentant, hoc est de daemone, de peccato, de morte; atque habet itidem in Corde suo, quasi in scrinio pretiosissimo repositos, immensos illos meritorum thesauros, triplicis eiusdem triumphi fructus, quos redempto humano generi largiter impertit. Haec est veritas consolationis plena, quam Apostolus gentium hisce verbis asseverat: « Ascendens in altum captivam duxit captivitatem, dedit dona hominibus. ... Qui descendit, ipse est et qui ascendit super omnes caelos, ut impleret omnia ». <sup>83</sup>

Spiritus Sancti donum, ad discipulos missi, primum est signum perspicuum munificae caritatis eius post triumphalem ascensum ad dexteram Patris. Siquidem post dies decem, Spiritus Paraclitus a caelesti Patre datus super eos descendit, in Cenaculo congregatos, secundum illud, quod in Ultima Cena promiserat: « Ego rogabo Patrem, et alium Paraclitum dabit

<sup>81</sup> *Sum. Theol.*, III, q. 66, a. 3, ad 3<sup>m</sup>: ed. Leon., tom. XII, 1906, p. 65.

<sup>82</sup> *Eph.* V, 2.

<sup>83</sup> *Eph.* IV, 8. 10.

vobis, ut maneat vobiscum in aeternum ».<sup>84</sup> Qui quidem Spiritus Paraclitus, cum sit mutuus Amor personalis, hoc est Patris erga Filium et Filii erga Patrem, ab utroque mittitur, ac species indutus quasi linguarum ignis in eorum animos infundit divinae caritatis copiam ceterorumque caelestium charismatum. Huius divinae caritatis infusio ab eo etiam Corde Servatoris nostri orta est, « in quo sunt omnes thesauri sapientiae et scientiae absconditi ».<sup>85</sup> Est enim haec caritas Iesu Cordis eiusque Spiritus donum; qui quidem est Spiritus Patris et Filii, ex quo et Ecclesiae ortus et eius mirabilis propagatio panditur ad universas ethnicorum gentes, quas idolorum cultus, fraternum odium, morum corruptio ac violentia foedaverant. Haec divina caritas est Cordis Christi eiusque Spiritus pretiosissimum donum; quae Apostolis et Martyribus fortitudinem illam imperitiit, qua roborati ad mortem usque, heroum more obitam, certaverunt, ut Evangelii veritatem praedicarent effusoque sanguine testarentur; quae Ecclesiae Doctoribus studium incensissimum indidit catholicae fidei illustrandae tutandaeque; quae Confessorum virtutes aluit, eosque ad utilissima mirandaque excitavit opera suae ceterorumque salutis aeternae ac temporariae profutura; quae denique Virginibus suasit ut sponte iucundeque sensuum voluptatibus abstinerent, seseque omnino caelestis Sponsi amori consecrarent. Divinae huic caritati celebrandae, quae ex Incarnati Verbi Corde exundans, in omnium credentium animos Sancti Spiritus ope infunditur, gentium Apostolus illum victoriae hymnum edidit, qui Iesu Christi Capitis eiusque mystici corporis membrorum triumphum de iis omnibus praedicaret, quae instaurandum inter homines Divinum amoris Regnum quovis modo praepedirent: « Quis ... nos separabit a caritate Christi? tribulatio? an angustia? an fames? an nuditas? an periculum? an persecutio? an gladius? ... Sed in his omnibus superamus propter eum qui dilexit nos. Certus

<sup>84</sup> IOAN. XIV, 16.

<sup>85</sup> Col. II, 3.

sum enim quia neque mors, neque vita, neque angeli, neque principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare a caritate Dei, quae est in Christo Iesu Domino nostro ».<sup>86</sup>

Nihil igitur vetat quominus sacratissimum Iesu Christi Cor adoremus, utpote particeps atque naturale ac significantissimum symbolum inexhaustae illius caritatis, qua Divinus Redemptor noster adhuc flagrat erga hominum genus. Illud siquidem, etsi mortalis huius vitae perturbationibus iam obnoxium non est, vivit tamen ac palpitat, atque indissolubili modo cum Divini Verbi Persona, et in ipsa et per ipsam cum divina voluntate eius coniungitur. Quamobrem, cum Cor Christi redundet divino humanoque amore, et cum omnium gratiarum thesaurorum praedives sit, quos Redemptor noster sua vita, suis cruciatibus suaque morte acquisivit, fons est profecto perennis illius caritatis, quam ipsius Spiritus effundit in omnia mystici sui corporis membra.

Cor igitur Servatoris nostri imaginem quodammodo refert divinae personae Verbi, itemque duplicis naturae, humanae nempe divinaeque; atque in eo considerare possumus non modo symbolum sed etiam veluti summam totius mysterii nostrae Redemptionis. Cum sacratissimum Iesu Christi Cor adoramus, in ipso et per ipsum tum increatum Divini Verbi amorem, tum humanum pariter eius amorem ceterosque affectus atque virtutes adoramus, quandoquidem uterque amor Redemptorem nostrum permovit ad sese pro nobis universaque Ecclesia Sponsa sua immolandum, secundum Apostoli sententiam: « Christus dilexit Ecclesiam, et se ipsum tradidit pro ea, ut illam sanctificaret, mundans lavacro aquae in verbo vitae, ut exhiberet ipse sibi gloriosam Ecclesiam, non habentem maculam, aut rugam, aut aliquid huiusmodi, sed ut sit sancta et immaculata ».<sup>87</sup>

<sup>86</sup> Rom. VIII, 35. 37-39.

<sup>87</sup> Eph. V, 25-27.

Ut Christus dilexit Ecclesiam, ita triplici eo amore, de quo diximus, eam adhuc impensissime adamat, qui quidem eum quasi advocatum<sup>88</sup> nostrum permovet, ut gratiam nobis et misericordiam conciliet a Patre, « semper vivens ad interpellandum pro nobis ».<sup>89</sup> Preces, quae ex inexhausto eius amore eliciuntur et admoventur ad Patrem intermittuntur numquam. Ut « in diebus carnis suae », <sup>90</sup> ita nunc in Caelis triumphans, Caelestem Patrem haud minore efficacitate adprecatur; eique, qui « sic dilexit mundum, ut Filium suum Unigenitum daret; ut omnis qui credit in eum non pereat, sed habeat vitam aeternam », <sup>91</sup> Cor suum ostendit vivum, et quasi sauciatum impensioreque aestuans amore, quam cum exanimus Romani militis lancea vulneratum est: « Propterea vulneratum est (Cor tuum), ut per vulnus visibile vulnus amoris invisibile videamus ». <sup>92</sup>

Haud dubium igitur est caelestem Patrem, « qui etiam proprio Filio suo non pepercit, sed pro nobis omnibus tradidit illum », <sup>93</sup> a tanto Advocato tam vehementi amore rogatum, per eum nullo non tempore uberem demissurum esse in homines universos divinarum gratiarum copiam.

#### IV

Voluimus, Venerabiles Fratres, per summa lineamenta vobis christianoque populo proponere intimam Sacratissimi Cordis Iesu cultus naturam perennesque divitias, quae ex eo oriuntur, prouti ex doctrina divinitus patefacta, quasi ex primario fonte panduntur. Putamus autem animadversiones has Nostras, quae

<sup>88</sup> Cfr. I Ioan. II, 1.

<sup>89</sup> Hebr. VII, 25.

<sup>90</sup> Hebr. V, 7.

<sup>91</sup> IOAN. III, 16.

<sup>92</sup> S. BONAVENTURA, Opusc. X: *Vitis mystica*, c. III, n. 5; *Opera Omnia*. Ad Claras Aquas (Quaracchi) 1898, tom. VIII, p. 164; cfr. S. THOM., *Sum. Theol.*, III, q. 54, a. 4: ed. Leon., tom. XI, 1903. p. 513.

<sup>93</sup> Rom. VIII, 32.



Evangelii luce collustrantur, in comperto posuisse hunc cultum nihil aliud, ad summam quod pertinet, esse nisi Incarnati Verbi divini humanique amoris cultum, atque etiam nisi illius amoris cultum, quo caelestis quoque Pater et Spiritus Sanctus peccatores homines prosequuntur; nam, ut Angelicus docet, Augustae Trinitatis caritas humanae Redemptionis principium est, quatenus in humanam Iesu Christi voluntatem, et in adorandum Cor eius uberrime exundans, eum eadem caritate permotum induxit ad suum sanguinem profundendum, ut nos a peccati captivitate redimeret:<sup>94</sup> « Baptismo habeo baptizari, et quomodo coarctor usquedum perficiatur ».<sup>95</sup>

Persuasum igitur habemus cultum, quo amorem Dei et Iesu Christi erga hominum genus prosequimur per augustum signum transverberati Cordis Redemptoris cruci affixi, numquam fuisse a fidelium pietate plane alienum, quamvis clara luce innotuerit ac miro quodam modo in Ecclesia quoquoversus sit propagatus temporibus a nostris non ita remotis, maxime postquam divinum hoc arcanum Dominus ipse quibusdam filiis suis, supernorum munerum copia donatis, privatim patefecerat, quos etiam nuntios ac praecones eiusdem sibi elegerat.

Re enim vera nullo non tempore fuerunt homines Deo praecipue devoti, qui, Almae Deiparae, Apostolorum, insignium Ecclesiae Patrum exempla secuti, adversus sanctissimam Christi naturam humanam, et praesertim erga vulnera, quibus eius corpus in salutari cruciatuum perpessione fuit dilaceratum, cultum adorationis, gratiarum actionis et amoris adhibuerunt.

Praeterea, nonne verbis ipsis: « Dominus meus, et Deus meus », <sup>96</sup> quae Thomas Apostolus effatus est, quaeque ex incredulo in fidei sectatorem eum mutatum esse significavere, haud dubia continetur professio fidei, adorationis et amoris, e

<sup>94</sup> Cfr. *Sum. Theol.*, III, q. 48, a. 5: ed. Leon., tom. XI, 1903, p. 467.

<sup>95</sup> LUC. XII, 50.

<sup>96</sup> IOAN. XX, 28.

vulnerata Domini humana natura ad maiestatem divinae Personae emergens?

Quodsi transfixo Servatoris Corde homines semper vehementius sunt adacti ad excolendum infinitum eius amorem, quo mortalium genus complectitur, quandoquidem cuiusvis aetatis christifidelibus verba Zachariae prophetae, a Ioanne Evangelista ad Iesum cruci affixum translata, dicta sunt: « Videbunt in quem transfixerunt », <sup>97</sup> est tamen fatendum non nisi paulatim ac progressionem quadam idem Cor peculiaris cultus obsequiis esse ornatum, quasi imaginem amoris humani et divini in Verbo Incarnato insidentis.

Perstringere autem volentibus huiusce cultus insignes quasi gradus per temporum, si pietatem spectes, ordines, statim nomina occurrunt quorundam, qui, hac in re praecipuam famam adepti, tamquam antesignani habendi sunt religionis formae, quae privatim atque pedetemptim in religiosis sodalitatibus magis magisque invalescebat. Ut exempla afferamus, de hoc Sacratissimi Cordis Iesu cultu firmando magisque in dies provehendo bene meruerunt S. Bonaventura, S. Albertus Magnus, S. Gertrudis, S. Catharina Senensis, B. Henricus Suso, S. Petrus Canisius, S. Franciscus Salesius. S. Ioannes Eudes auctor fuit primi officii liturgici, honori Sacratissimi Cordis Iesu celebrandi, cuius quidem sollemne festum, multis Episcopis Galliae probantibus, die xx mensis Octobris anno MDCLXXII primum peractum est. At potissimum profecto locum in iis, qui nobilissimum hoc religionis genus promoverunt, obtinet S. Margaritha Maria Alacoque, quae, B. Claudio de la Colombière, pietatis magistro ipsius, adiutricem praebente operam, id, praeclaro studio incensa, est assecuta, ut huiusmodi cultus ratio tot aucta incrementis, non sine magna christifidelium admiratione, constitueretur, atque, amoris et satisfactionis proprietatibus insignis, a ceteris distingueretur pietatis christianae formis. <sup>98</sup>

<sup>97</sup> IOAN. XIX, 37; Cfr. ZACH. XII, 10.

<sup>98</sup> Cfr. Litt. Enc. *Miserentissimus Redemptor*: A. A. S. XX, 1928, pp. 167-168.

Satis est hanc memoriam illius aetatis, qua hic Sacratissimi Cordis Iesu cultus augescebat, repetere, ut plane intellegamus mirabilem eius progressionem esse ex eo profectam quod cum natura christianae religionis omnino congrueret, quippe quae esset religio amoris. Cultum ergo huiusmodi non inde exordium sumpsisse dicendum est, quod a Deo sit privatim patefactus, neque repente in Ecclesia exstitisse; sed e fide vivida fervidaque sponte effluisse pietate, qua homines, supernis cumulati muneribus, in adorandum Redemptorem et gloriosa eius vulnera erant affecti, immensi amoris eiusdem quasi testimonia perfringentia animos quam maxime. Proinde, ut patet, ea, quae S. Margaritae Mariae revelata sunt, nihil novi doctrinae catholicae attulerunt. Earum autem momentum in eo est, quod Christus Dominus — Sacratissimum Cor suum ostendens — modo extraordinario et singulari mentes hominum ad mysterium amoris misericordissimi Dei erga genus humanum contemplandum colendumque advocare voluit. Hac siquidem peculiari manifestatione Christus Cor suum expressis ac repetitis verbis indicavit tamquam symbolum, quo homines ad cognitionem et agnitionem amoris sui allicerentur; simulque tamquam signum et pignus constituit misericordiae et gratiae pro Ecclesiae necessitatibus nostrorum temporum.

Praeterea hunc cultum ex ipsis christianae doctrinae dinoscere principiis, eo aperte demonstratur, quod Sedes Apostolica prius approbavit hoc sollemne liturgicum quam scripta S. Margaritae Mariae; nam, non proprie rationem habens privatae cuiusvis patefactionis divinitus patratae, sed fidelium votis benigne obsecundans, Sacrum Consilium religionis ritibus praepositum, decreto die xxv mensis Ianuarii anno MDCLXV lato, et a Decessore Nostro Clemente XIII die vi mensis Februarii eiusdem anni approbato, Episcopis Polonis et Romanae Archiconfraternitati a Sacratissimo Corde Iesu, quae vocatur, festum liturgicum concessit celebrandum; quod quidem Apostolica Sedes eo consilio fecit ut hoc modo ampliaretur cultus iam

exsistens ac vicens, cuius esset « symbolice renovare memoriam illius divini amoris », <sup>99</sup> quo Servator noster impulsus est ut victimam se praeberet hominum crimina expiantem.

Primam vero hanc approbationem, privilegii nomine factam certisque arctatam finibus, altera post unum fere saeculum est subsecuta, longe maioris momenti ac sollemnioribus concepta verbis. Decretum dicimus, ut supra memoravimus, a Sacro Consilio religionis ritibus tuendis die xxiii mensis Augusti anno MDCCCLVI editum, quo Decessor Noster imm. mem. Pius IX, preces Episcoporum Galliae et universi fere nominis Catholici admittens, festum Sacratissimi Cordis Iesu ad totam pertinere iussit Ecclesiam, ab eaque rite celebrari mandavit. <sup>100</sup> Quod factum non immerito sempiternae est christifidelium memoriae commendandum, nam, quemadmodum in liturgia eiusdem sollemnis scriptum videmus: « Exinde cultus Sacratissimi Cordis quasi flumen exundans, prolutis impedimentis omnibus, per totum se orbem effudit ».

Ex iis, quae hactenus, Venerabiles Fratres, exposuimus, perspicue patet e divinis litteris, ex doctrina a maioribus tradita, e sacra liturgia, quasi e liquido altoque fonte, fidelibus repetendum esse cultum Sacratissimi Cordis Iesu, si in intimam eius naturam cupiant penetrare, eamque pie meditantes, pabulum accipere ad alendum augendumque religionis ardorem. Quodsi cultus hic assidue, mente illuminata altiusque perspiciente exerceatur, fieri non potest quin animus fidelis ad suam illam cognitionem caritatis Christi perveniat, quae summam efficit vitae christianae, ut Apostolus, de se ipso expertus, docet: « Huius rei gratia flecto genua mea ad Patrem Domini nostri Iesu Christi ... ut det vobis secundum divitias gloriae suae virtute corroborari per Spiritum eius in interiorem hominem; Christum habitare per fidem in cordibus vestris, in caritate

<sup>99</sup> Cfr. A. GARDELLINI, *Decreta authentica*, 1857, n. 4579, tom. III, p. 174.

<sup>100</sup> Cfr. *Decr. S. O. Rit.*, apud N. NILLES, *De rationibus festorum Sacratissimi Cordis Iesu et purissimi Cordis Mariae*, 5<sup>a</sup> ed., Innsbruck, 1885, tom. I, p. 167.

radicati et fundati; ut possitis ... scire etiam supereminentem scientiae caritatem Christi, ut impleamini in omnem plenitudinem Dei ». <sup>101</sup> Cuius omnia complectentis plenitudinis Dei clarissima imago est ipsum Cor Christi Iesu: plenitudinem dicimus misericordiae, quae propria est Novi Testamenti, in quo « benignitas et humanitas apparuit Salvatoris nostri Dei », <sup>102</sup> nam: « Non misit Deus Filium suum in mundum ut iudicet mundum, sed ut salvetur mundus per ipsum ». <sup>103</sup>

Ecclesiae igitur, hominum magistrae, semper fuit persuasum, ex quo priora de cultu Sacratissimi Cordis Iesu legitima edidit documenta, primarias huius rationes, hoc est actus amoris et satisfactionis, quibus infinitus amor Dei erga mortaliū genus colatur, minime esse *materialismi*, qui dicitur, et superstitionis veneno infectas, sed eundem cultum esse formam pietatis, quo plane perficiatur religio ad animum attinens et vera omnino, quam ipse Servator, mulierem Samaritanam allocutus, praenuntiavit: « Venit hora, et nunc est, quando veri adoratores adorabunt Patrem in spiritu et veritate. Nam et Pater tales quaerit, qui adorent eum. Spiritus est Deus; et eos, qui adorant eum, in spiritu et veritate oportet adorare ». <sup>104</sup>

Nefas igitur est asserere contemplationem physici Cordis Iesu impedire quominus ad intimum Dei amorem perveniatur, et animum in via, qua ad summas proficiat virtutes, remorari. Quam falsam mysticam doctrinam Ecclesia omnino reicit, quemadmodum, per Decessorem Nostrum fel. rec. Innocentium XI locuta, commenta respuit eorum, qui ista effutiebant: « Nec debent (animae huius viae internae) elicere actus amoris erga beatam Virginem, Sanctos aut humanitatem Christi: quia, cum ista obiecta sensibilia sint, talis est amor erga illa. Nulla crea-

<sup>101</sup> Eph. III, 14. 16-19.

<sup>102</sup> Tit. III, 4.

<sup>103</sup> IOAN. III, 17.

<sup>104</sup> IOAN. IV, 23-24.



tura, nec beata Virgo nec Sancti sedere debent in nostro corde: quia solus Deus vult illud occupare et possidere ». <sup>105</sup> Qui ita sentiunt, eos liquet opinari imaginem Cordis Christi nihil altius significare quam eius sensibilem amorem, atque adeo non esse huiusmodi ut in ea, quasi in novo fundamento, innitatur cultus latriae, qui solum ad id pertinet, quod suapte natura est divinum. At hanc sacras imagines interpretandi rationem omnino falsam esse non est quin videat, cum latius patens earundem significatio nimis arctis finibus circumscribatur. Contra atque hi, sentiunt docentque theologi catholici, e quibus S. Thomas haec scribit: « Imaginibus non exhibetur religionis cultus, secundum quod in seipsis considerantur, quasi res quaedam: sed secundum quod sunt imagines ducentes in Deum incarnatum. Motus autem qui est in imaginem, prout est imago, non sistit in ipsa, sed tendit in id cuius est imago. Et ideo ex hoc quod imaginibus Christi exhibetur religionis cultus, non diversificatur ratio latriae, nec virtus religionis ». <sup>106</sup> Ad ipsam igitur Verbi Incarnati Personam, ut ad finem, dirigitur cultus qui, comparate sane aestimandus, imaginibus adhibetur, sive reliquiae sunt ad acerba, quae Servator nostra causa pertulit, tormenta pertinentes, sive simulacrum ipsum, vi atque significatione cetera superans omnia, scilicet transverberatum Cor Christi in crucem acti.

Itaque a re corporali, quae est Cor Christi Iesu, eiusque naturali significatione nobis licet addecetque nos, christiana fide suffultos, ascendere non solum ad contemplandum eius amorem, qui sensibus percipiatur, sed altius etiam ad considerandum et adorandum celsissimum amorem infusum; ac denique, suavi pariter et sublimi quodam animi cursu, ad meditandum et adorandum Amorem divinum Verbi Incarnati; quandoquidem e fide, qua credimus utramque naturam, huma-

<sup>105</sup> INNOCENTIUS XI, Constit. Ap. *Coelestis Pastor*, 19 Novembris 1687; *Bullarium Romanum*, Romae, 1734, tom. VIII, p. 443.

<sup>106</sup> *Sum. Theol.*, II-II, q. 81 a. 3 ad 3<sup>m</sup>: ed. Leon., tom. IX, 1897, p. 180.

nam ac divinam, in Persona Christi esse unitam, mente concipere possumus necessitudines illas arctissimas quae inter sensibilem amorem physici Cordis Iesu intercedunt et duplicem amorem, spirituales quidem, humanum scilicet ac divinum. Hi enim amores non tantum una simul existentes dicendi sunt in adorabili Persona Divini Redemptoris, sed etiam inter se naturali nexu coniuncti, quatenus divino humanus sensibilisque subiciuntur, atque illius analogicam similitudinem referunt. Non autem contendimus Cor Iesu ita esse intellegendum ut in eo habeatur et adoretur imago formalis, quae dicitur, seu signum perfectum et absolutum eius amoris divini, cum intima huius essentia nullo modo adaequari possit quavis creata imagine; sed christifidelis, Cor Iesu excolens, una cum Ecclesia signum adorat et quasi vestigium Caritatis divinae, quae eo progressa est ut etiam Corde Verbi Incarnati hominum genus adamaret tot flagitiis contaminatum.

Necesse est ergo ut in hoc doctrinae capite tanti momenti tantaeque prudentiae unusquisque animo semper teneat veritatem naturalis symboli, quo physicum Cor Iesu ad Personam Verbi refertur, totam niti in veritate primaria hypostaticae unionis; si quis autem verum esse hoc negaverit, falsas opiniones, ab Ecclesia non semel reiectas, instauret, utpote quae uni Personae in Christo, utraque tamen natura distincta manente et integra, adversentur.

Qua praecipua veritate constituta, mente percipimus Cor Iesu esse cor personae divinae, hoc est Verbi Incarnati, atque adeo eo repraesentari et quasi sub oculos subici totum amorem, quo nosmet est complexus et etiamnum complectitur. Quam ipsam ob causam tantum est cultui Sacratissimi Cordis tribuendum ut existimetur absolutissima, si usum et exercitationem spectes, professio christianae religionis. Haec enim est religio Iesu, quae tota posita est in Mediatore homine ac Deo; ita ut ad Cor Dei perveniri nequeat nisi per Cor Christi, quemadmodum ipse ait: « Ego sum via, et veritas, et vita. Nemo venit ad Pa-

trem, nisi per me ».<sup>107</sup> Quae cum ita sint, facile colligimus cultum Sacratissimi Cordis Iesu, ad ipsam rei naturam quod attinet, esse cultum amoris, quo Deus per Iesum nos dilexit, ac simul nostri exercitationem amoris, quo in Deum et in ceteros ferimur homines; vel, ut aliis utamur verbis, huiusmodi cultus in amorem Dei erga nos intenditur, in eum nempe qui adoretur, cui gratiae agantur, cuius ad imitationem vivatur: eoque spectat, tamquam ad finem assequendum, ut amorem, quo Deo ceterisque devincimur hominibus, ad perfectionem absolutionemque perducamus, alacrius in dies exsequendo mandatum *novum*, quod Divinus Magister Apostolis quasi sacram hereditatem dedit, cum diceret: « Mandatum novum do vobis, ut diligatis invicem, sicut dilexi vos. ... Hoc est praeceptum meum, ut diligatis invicem, sicut dilexi vos ».<sup>108</sup> Quod mandatum reapse *novum* est et Christi *proprium*, nam, ut ait Aquinas: « Brevis differentia Novi et Veteris Testamenti; ut enim dicit Ieremias: « Feriam domui Israel foedus novum ».<sup>109</sup> Quod autem mandatum istud in Veteri Testamento ex timore et amore sancto erat, pertinebat ad Novum Testamentum: unde hoc mandatum erat in veteri lege, non tamquam proprium eius, sed ut praeparativum novae legis ».<sup>110</sup>

## V

Antequam scribendi finem facimus de germana huiusmodi cultus ratione eiusque christiana praestantia, quas hactenus vobis considerandas proposuimus — pulcherrimas sane ac solacii plenas — Nos, Apostolici muneris conscientia ducti, quod quidem primum Beato Petro concreditum est post triplicem in Christum Dominum amoris professionem peractam, opportu-

<sup>107</sup> IOAN. XIV, 6.

<sup>108</sup> IOAN. XIII, 34; XV, 12.

<sup>109</sup> IER. XXXI, 31.

<sup>110</sup> *Comment. in Evang. S. Ioann.*, c. XIII, lect. VII, 3, ed. Parmae, 1860, tom. X, p. 541.

num ducimus vos iterum, Venerabiles Fratres, ac per vos universos quotquot in Christo habemus dilectissimos filios adhortari, ut contentiore usque studio suavissimam hanc religionis formam promovere studeatis; hinc enim nostris etiam temporibus utilitates plurimas orituras esse confidimus.

Re quidem vera, si allata argumenta, quibus transfixi Cordis Iesu cultus innititur, rite perpenduntur, omnibus profecto perspicuum est, heic non de communi pietatis forma agi, quam cuilibet ad arbitrium liceat ceteris posthabere aut parvipendere, sed de religionis obsequio, quod ad christianam adipiscendam perfectionem quam maxime conducat. Nam si « devotio — secundum ipsam theologicam eamque communem notionem, quam Doctor Angelicus tradit — nihil aliud esse videtur quam voluntas quaedam prompte tradendi se ad ea quae pertinent ad Dei famulatum », <sup>111</sup> num Dei famulatus magis debitus ac necessarius esse potest, itemque nobilior ac suavior, quam qui amor valeat inservire? Quid vero Deo gratius acceptiusque famulatu illo, qui divinae caritati obsequatur, quique amoris causa ipsi praestetur, quandoquidem quodlibet servitium ultro exhibitum quodammodo donum est, atque amor « habet rationem primi doni, per quod omnia dona gratuita donantur »? <sup>112</sup> Summo igitur in honore habenda est ea religionis forma, cuius ope homo magis Deum colit ac diligit, seque facilius atque expeditius divinae devovet caritati; et quam ipse Redemptor noster proponere christianoque populo commendare dignatus est, itemque Summi Pontifices memorandis editis documentis tutati sunt magnisque laudibus exornarunt. Quamobrem temerariam ac detrimentosam rem egerit Deumque ipsum offenderit quisquis insigne hoc a Iesu Christo Ecclesiae datum beneficium parvi existimaverit.

Quae cum ita sint, haud dubium est quin christifideles, sacratissimo Redemptoris Cordi obsequium tribuentes, officio

<sup>111</sup> *Sum. Theol.*, II-II, q. 82, a. 1: ed. Leon., tom. IX, 1897, p. 187.

<sup>112</sup> *Ibid.* I, q. 38, a. 2: ed. Leon., tom. IV, 1888, p. 393.

obtemperent sane gravissimo, quo Deo servire tenentur, ac simul Creatori Redemptorique se suaque omnia addicant, sive quae intime sentiunt, sive quae in vitae actione operantur, pareantque hoc modo divino illi mandato: « Diliges Dominum Deum tuum ex toto corde tuo, et ex tota anima tua, et ex tota mente tua, et ex tota virtute tua ».<sup>113</sup> Iisdem praeterea firma certitudo est, se ad Deum colendum non ob privatum commodum praecipue permoveri, quod corpus vel animum, praesentem vel aeternam vitam respiciat, sed ob ipsius Dei bonitatem, cui obsequium praestare contendunt, eum redamando, adorando, eidemque debitas persolvendo grates. Nisi ita sit, cultus Sacratissimi Cordis Iesu germanae christianae religionis indoli minime congruat, cum homo huiusmodi obsequio non divinum amorem praesertim colat; atque adeo haud immerito uti aliquando fieri solet, de nimio sui ipsius amore ac sollicitudine arguuntur, qui nobilissimum hoc pietatis genus perperam intellegunt aut minus recte in usum deducunt. Quamobrem firmiter omnes persuasum habeant, in cultu augustissimo Cordi Iesu exhibendo, non externa pietatis opera primas potioresque habere partes, nec causam potissimum ex beneficiis esse petendam, quae Christus Dominus idcirco privatis pollicitationibus spopondit, ut homines praecipua catholicae religionis officia, amoris nempe atque expiationis, ferventiore studio persolverent, atque ita suo etiam ipsorum spirituali emolumento quam maxime consulerent.

Itaque, ad istiusmodi devotionis formam alacriter amplectendam, universos Nostros compellimus in Christo filios, sive qui defluentes ex Redemptoris Corde salubres aquas haurire iam assuescunt, sive praesertim qui spectatorum more curioso dubitantique animo eminus adspiciunt. Sedulo iidem considerent de cultu agi, ut iam diximus, qui in Ecclesia iam diu invaluit, ipsisque Evangelicis Litteris solide innititur; cui doctrina

<sup>113</sup> MARC. XII, 30; MATTH. XXII, 37.



a maioribus tradita sacraque Liturgia aperte favent, et quem Romani ipsi Pontifices innumeris amplissimisque laudibus extulerunt; qui quidem non satis habuerunt festum in honorem augustissimi Redemptoris Cordis instituere et ad universam Ecclesiam pertinere, verum etiam auctores fuerunt qui eidem Sacratissimo Cordi universum humanum genus sollemni ritu dicarent ac devoverent.<sup>114</sup> Accedunt denique uberes laetissimi-que fructus exinde in Ecclesiam derivati, hoc est innumeri ad christianam religionem reditus, multorum fides vividius excitata, arctior christifidelium cum amantissimo Redemptore nostro coniunctio: quae omnia hisce potissimum novissimis decenniis crebrioribus luculentioribusque significationibus ante oculos prodire.

Dum mirandum huiusmodi circumspicimus spectaculum, pietatem scilicet erga Sacratissimum Cor Iesu tam late apud omnes christifidelium ordines propagatam atque incensam, grato sane iucundoque perfundimur consolationis sensu; ac postquam debitas persolvimus Redemptori nostro grates, qui bonitatis infinitus est thesaurus, facere non possumus quin iis omnibus paterno animo gratulemur qui sive e clero, sive ex laicorum ordine in hunc promovendum cultum actuosam suam contulerunt operam.

Quamquam vero, Venerabiles Fratres, pietas in Sanctissimum Cor Iesu salutare ubique peperit christianae vitae fructus, neminem tamen fugit, militantem in terris Ecclesiam, ac praesertim civilem hominum consortionem, nondum plenam illam attigisse absolutamque perfectionis formam, quae Iesu Christi, Mystici Ecclesiae Sponsi humanique generis Redemptoris, votis optatisque respondeat. Haud pauci enim Ecclesiae filii huius matris vultum, quem in se ipsi referunt, nimiis maculis, nimiis rugis deturpant; non omnes christifideles ea morum

<sup>114</sup> Cfr. LEO XIII, Enc. *Annum Sacrum: Acta Leonis*, vol. XIX, 1900, p. 71 sq.; Decr. S. C. Rituum, 28 Iun. 1899, in Decr. Auth. III, n. 3712; PIUS XI, Enc. *Miserentissimus Redemptor*: A. A. S. 1928, p. 177 sq.; Decr. S. C. Rit., 29 Ian. 1929: A. A. S. XXI, 1929, p. 77.

sanctitudine nitent, ad quam divinitus vocantur; peccatores in male relictam Patris domum non omnes sunt reversi, ut inibi denuo *stolam primam*<sup>115</sup> induant atque anulum, fidei erga animi sui sponsum insigne, digito recipiant; non omnes ethnici homines inter membra Mystici Corporis Christi adhuc sunt cooptati. Nec satis. Nam si acerbo Nos afficit dolore languescens bonorum fides, quorum in animis, fallaci terrestrium rerum cupiditate deceptis, divinae caritatis ardor defervet, ac pedetemptim restinguitur, multo vehementius excruciant impiorum hominum molimina, qui, veluti ab inferno hoste excitati, nunc cum maxime, implacabili apertoque odio flagrant in Deum, in Ecclesiam, ac praesertim in Eum qui in terris Divini Redemptoris personam gerit, eiusque erga homines caritatem repraesentat, secundum vulgatissimam illam Mediolanensis Doctoris sententiam « is enim interrogatur de quo dubitatur, sed Dominus non dubitat qui [Petrum] interrogat, non ut disceret, sed ut doceret quem elevandus in caelum, *amoris sui nobis vicarium relinquebat* ».<sup>116</sup>

Re quidem vera odium in Deum in eosque qui Dei vice legitime funguntur, eiusmodi delictum est, quo maius numquam patrare possit homo, ad Dei imaginem et similitudinem creatus, necnon ad eius perfruendam amicitiam perfectam perpetuoque in caelo mansuram destinatus; siquidem odio in Deum quam maxime a Summo Bono homo disiungitur, eodemque impellitur ad respuendum a seipso a suisque proximis quidquid a Deo proficiscitur, quidquid cum Deo coniungit, quidquid ad Deum perfruendum perducit, hoc est veritatem, virtutem, pacem, iustitiam.<sup>117</sup>

Cum igitur, pro dolor, cernere sit, eorum numerum, qui aeterni Numinis hostes se iactant, alicubi crebrescere, itemque commenticia *materialismi* placita re et opinione propagari,

<sup>115</sup> LUC. XV, 22.

<sup>116</sup> *Exposit. in Evang. sec. Lucam*, l. X, n. 175: P. L. XV, 1942.

<sup>117</sup> Cfr. S. THOM., *Sum. Theol.*, II-II, q. 34, a. 2: ed. Leon., tom. VIII, 1895, p. 274.

effrenamque cupiditatum licentiam passim extolli, quid mirum si multorum in animis deferbeat caritas, quae christianae religionis suprema lex est, quae verae perfectaeque iustitiae fundamentum exstat firmissimum et quae pacis castarumque deliciarum fons est praecipuus? Etenim, ut Servator noster admonuit: « Quoniam abundavit iniquitas, refrigescet caritas multorum ». <sup>118</sup>

Tot malorum oblato conspectu, quae, si alias umquam, hodie potissimum singulos homines, domesticos convictus, nationes, universumque terrarum orbem tam acriter perturbant, undenam est, Venerabiles Fratres, medicina quaerenda? Num pietatis forma inveniri potest, quae augustissimo Cordis Iesu cultu praestantior sit, quae congruentius respondeat propriae catholicae fidei indoli, quae aptius hodiernis Ecclesiae atque humani generis necessitatibus succurrat? Quodnam religionis obsequium hoc nobilius, suavius, salubrius, quandoquidem cultus, de quo agitur, totus in ipsam Dei caritatem <sup>119</sup> dirigitur? Denique quid efficacius caritate Christi — quam pietas erga Sacratissimum Cor Iesu cotidie magis auget et fovet — christifideles permovere potest ad evangelicam legem in vitae actionem reapse deducendam, qua quidem posthabita, ut praeclare monent Spiritus Sancti verba: « Opus iustitiae pax », <sup>120</sup> haudquaquam veri nominis pacem inter homines haberi licet?

Quapropter, proximi Decessoris Nostri exemplum secuti, universis Nostri in Christo filiis perplacet iterum illa monitoria adhibere verba, quibus Leo XIII, imm. mem., ad exitum vergente superiore saeculo, christifideles omnes allocutus est, itemque quotquot de sua ipsorum deque civilis societatis salute sincero animo sunt solliciti: « En alterum hodie oblatum oculis auspicatissimum divinissimumque signum: videlicet Cor Iesu sacratissimum ... splendidissimo candore inter flammam elucens.

<sup>118</sup> MATTH. XXIV, 12.

<sup>119</sup> Cfr. *Enc. Misericordissimus Redemptor*: A. A. S., XX, 1928, p. 166.

<sup>120</sup> Is. XXXII, 17.

In eo omnes collocandae spes: ex eo hominum petenda atque exspectanda salus ». <sup>121</sup>

Flagrantissimis quoque Nostris in optatis est, ut devotionis obsequium erga Cor Iesu tamquam unitatis, salutis, pacis vexillum sibi habeant et fontem omnes qui christiano gloriantur nomine, quique ad Regnum Christi in orbe stabiliendum opere decertant. Attamen ne quis putet, huiusmodi obsequio aliquid ex ceteris detrahi religionis formis, quibus populus christianus, Ecclesia duce, divinum prosequitur Redemptorem. Sed contra incensa erga Cor Iesu pietas cultum praesertim sacratissimae Crucis, necnon amorem erga augustissimum altaris Sacramentum procul dubio fovebit et provehet. Enimvero asserere possumus — quod quidem ea, quae S. Gertrudi ac S. Margaritae Mariae a Iesu Christo revelata sunt, mirabili modo illustrant — neminem umquam de Iesu Christo cruci affixo apta prorsus ratione sentire, nisi cui mystica ipsius Cordis penetralia patuerint. Nec facile percipere erit vim amoris, quo Christus compulsus nobis se ipse exhibuit spirituale alimentum, nisi peculiari modo Eucharistici Cordis Iesu cultum fovendo, cuius est recolere, ut verbis utamur Decessoris Nostri fel. rec. Leonis XIII, « supremae dilectionis actum quo Redemptor Noster omnes Cordis sui divitias effundens, ut nobiscum ad exitum usque saeculorum moram ageret, adorabile instituit Eucharistiae Sacramentum ». <sup>122</sup> Etenim « non minima eius Cordis particula est Eucharistia, quam nobis ex tanta Cordis sui dedit caritate ». <sup>123</sup>

Denique, desiderio vehementer permoti firma opponendi repagula impiis osorum Dei et Ecclesiae machinationibus, itemque domesticam et civilem societatem ad Dei proximorumque amo-

<sup>121</sup> Enc. *Annum Sacrum: Acta Leonis*, vol. XIX, 1900, p. 79; Enc. *Miserentissimus Redemptor: A. A. S.*, XX, 1928, p. 167.

<sup>122</sup> *Litt. Apost. quibus Archisodalitas a Corde Eucharistico Iesu ad S. Ioachim de Urbe erigitur*, 17 Febr. 1903: *Acta Leonis*, vol. XXII, 1903, p. 307 sq.; cfr. Enc. *Mirae caritatis*, 22 Maii 1902: *Acta Leonis*, vol. XXII, 1903, p. 116.

<sup>123</sup> S. ALBERTUS M., *De Eucharistia*, dist. VI, tr. 1, c. 1: *Opera Omnia*, ed. Borgnet, vol. XXXVIII, Parisiis, 1890, p. 358.

rem iterum adducendi, asseverare non dubitamus, cultum Sacratissimi Cordis Iesu efficacissimam divinae caritatis disciplinam esse; divinam caritatem dicimus, qua nitatur oportet Regnum Dei in singulorum animis, in domestico convictu, in nationibus stabiliendum, quemadmodum idem Decessor Noster piaem sapientissime monet: « Iesu Christi regnum a divina caritate vim et formam sumit: diligere sancte atque ordine, eius est fundamentum et summa. Ex quo illa necessario fluunt, officia inviolate servare: nihil alteri de iure detrahare: humana caelestibus inferiora ducere: amorem Dei rebus omnibus anteponere ». <sup>124</sup>

Quo vero ex cultu erga augustissimum Cor Iesu in christianam familiam, imo et in omne genus hominum copiosiora emolumenta fluant, curent christifideles, ut eidem cultus etiam erga Immaculatum Dei Genetricis Cor arcte copuletur. Cum enim ex Dei voluntate in humanae Redemptionis peragendo opere Beatissima Virgo Maria cum Christo fuerit indivulse coniuncta, adeo ut ex Iesu Christi caritate eiusque cruciatibus cum amore doloribusque ipsius Matris intime consociatis sit nostra salus profecta, congruit omnino ut a christiano populo, quippe qui a Christo per Mariam divinam vitam sit adeptus, post debita erga Sacratissimum Cor Iesu exhibita obsequia, etiam Cordi amantissimo caelestis Matris adiuncta pietatis, amoris, grati expiantisque animi studia praestentur. Cui quidem sapientissimo suavissimoque Dei Providentis consilio omnino concinit memorandus ille consecrationis ritus, quo Ipsimet Ecclesiam sanctam itemque universum terrarum orbem Intaminato Cordi Beatae Mariae Virginis sollemniter dicavimus ac devovimus. <sup>125</sup>

Cum autem hoc volvente anno, ut supra attigimus, feliciter primum expleatur saeculum ex quo iussu Decessoris Nostri fel. rec. Pii IX festum Sacratissimi Cordis Iesu in universa celebratur Ecclesia, vehementer cupimus, Venerabiles Fratres, ut

<sup>124</sup> Enc. *Tametsi*: *Acta Leonis*, vol. XX, 1900, p. 303.

<sup>125</sup> Cfr. A. A. S. XXXIV, 1942, p. 345 sq.



saecularis huiusmodi memoria a christiano populo publicis adorationis, gratiarum actionis, expiationisque obsequiis divino Cordi Iesu exhibendis ubique sollemniter agatur. Quae quidem christianae laetitiae christianaeque pietatis sollemnia peculiarissimo religionis ardore profecto celebrabuntur. — coniunctis quidem cum christifidelium omnium caritatis vinculis communibusque precibus — in Natione illa, ex qua, non sine Dei nutu, sancta virgo huius cultus faulrix ac praeco indefatigabilis ortum duxit.

Interea suavissima recreati spe, atque animo iam illos praecipientes spirituales fructus, quos ex cultu sacratissimi Cordis Iesu — si quidem recta, quam proposuimus, ratione intellegatur, atque ad rem actiosa opera deducatur — affluenter in Ecclesia orituros confidimus, supplices admovemus Deo preces, ut hisce flagrantissimis votis Nostris valido gratiarum suarum praesidio benignus obsecundet; idque, divino adspirante Numine, auspicato contingat, ut ex statis huius anni celebrationibus pia christifidelium erga Sacratissimum Cor Iesu voluntas maiora in dies incrementa capiat, latiusque in terrarum orbe universo pateat omnibus suavissimum eius imperium et regnum: regnum nempe « veritatis et vitae; regnum sanctitatis et gratiae; regnum iustitiae, amoris et pacis ». <sup>126</sup>

Horum autem munerum in auspiciu, cum vobis singulis, Venerabiles Fratres, tum clero populoque curis vestris concredit, iis nominatim qui dedita opera Sacratissimi Cordis Iesu cultum foveant ac provehant, Apostolicam Benedictionem effuso animo impertimus.

Datum Romae, apud S. Petrum, die xv mensis Maii, anno MDCCCCLVI, Pontificatus Nostri duodevicesimo.

PIUS PP. XII

<sup>126</sup> Ex Miss. Rom., Praef. Iesu Christi Regis.

## CONSTITUTIO APOSTOLICA

PRINCIPIA DANTUR ET STATUTA GENERALIA PROBANTUR, QUIBUS INFORMARI REGIQUE DEBENT II QUI VOCATI SUNT AD STATUM ACQUIRENDAE RELIGIOSAE PERFECTIONIS AMPLECTENDUM EORUMQUE EDUCATORES.

## PIUS EPISCOPUS

SERVUS SERVORUM DEI

AD PERPETUAM REI MEMORIAM

Sedes sapientiae, Dei scientiarum Domini <sup>1</sup> Genetrix Apostolorum-que Regina, <sup>2</sup> sanctissima Virgo Maria, cuius venerationi integrum annum sacrum dicavimus, haud perperam Mater et Magistra peculiari ratione eorum omnium habetur, qui acquirendae perfectionis status amplectentes, apostolicam simul Christi summi Sacerdotis militiam agere contendunt. Huic enim tantae tamque excelsae vocationi religiosae scilicet simulque sacerdotali et apostolicae, instituendae et conformandae ut efficaciter incumbant, illius ductu et auxilio summopere egent, quae gratiarum omnium ad sanctificationem spectantium Mediatrix constituta est et catholici sacerdotii atque apostolatus Mater et Regina merito appellatur; cuius proinde favorem enixe imploramus, ut quae Nobis in hisce normis statuendis superni luminis Conciliatrix affuit, ipsa illis, quibus easdem ad effectum deducendi munus incumbet, patrocinio suo, Auxiliatrix adsistat.

## I

Maximo enim Dei Providentis beneficio factum est, ut iugiter decursu saeculorum Christus Redemptor animis a se praedilectis, interiore ac quasi mystico sermone, invitamentum illud inspiraverit, quod iam voce viva adulescenti de vita aeterna interroganti porrexerat: *veni, sequere me*.<sup>3</sup> Continuo pariter non paucos ex his qui verbum istud, Deo dante, exceperint, atque non secus ac sancti Apostoli illud professi sunt: *ecce nos reliquimus omnia et secuti sumus te*,<sup>4</sup> Dominus noster

<sup>1</sup> Cfr. 1 Reg. 2, 3.

<sup>2</sup> Ex Litan. Lauret.

<sup>3</sup> Mr. 19, 21.

<sup>4</sup> Mr. 19, 27.

hominum fecit *piscatores*,<sup>5</sup> et *operarios* <sup>6</sup> sibi delegit in *messem suam* mittendo.

Quod non minus hodie contingit atque olim, cum in dies frequentior ac penitior evaserit coniunctio statuum acquirendae perfectionis cum dignitate sacerdotali et munere apostolico. Etenim, dum antiquitus Monachi plerumque sacerdotio carebant et pauci inter eos ad illud suscipiendum quasi necessitate compulsi, ut populi scilicet ad christianam religionem converterentur, a propria Regula fere distrahebantur, dumque postea Mendicantes, etsi mirabili spiritu apostolico imbuti ad Sacerdotium non omnes Regula adigebantur, ipso sancto Patre Assisiensi eo minime aucto; Canonici Regulares e contrario et praecipue Clerici item Regulares, ex speciali divinitus accepta vocatione sacros Ordines recipiebant atque exercebant. Quod deinde innumerae imitatae sunt Congregationes et Societates vitae communis eodem titulo clericales. Quibus nunc accedunt, Deo semper singularum aetatum necessitatibus providente, nonnulla Instituta saecularia eademque clericalia.

Praeterea, in praesens apud ipsos quoque antiquiores Ecclesiae Latinae Ordines, non formaliter laicos nuncupatos,<sup>7</sup> sodales omnes, iis exceptis qui coadiutores dicuntur seu conversi, sacerdotio destinantur, quod ceterum omnino requiritur in eis qui eorundem Ordinum regimen assumunt.

Quapropter temporibus nostris turba magna fruitur Ecclesia ministrorum, qui simul et perfectioni ope evangelicorum consiliorum acquirendae et sacerdotalibus muneribus adimplendis incumbunt. Quorum virorum multitudo clerum constituit qui religiosus dicitur, iuxta quidem eum qui saecularis seu dioecesanus appellatur, utrisque autem fraterna vigentibus ac florentibus aemulatione mutuoque fecundo auxilio, sub una eademque suprema Romani Pontificis auctoritate, incolumi sane Episcoporum potestate.

Iam vero omnibus compertum est clerum illum religiosum, ut duplicem proprium finem rite et secure assequatur, sapientissimis normis indigere, quibus eiusdem institutio ac conformatio sive religiosa sive clericalis et apostolica regatur et promoveatur.

Cui quidem necessitati hucusque magnopere satisfaciunt singularum sodalitatum constitutiones seu statuta de iuvenibus instituendis aut de studiorum ratione moderanda; nec certe desunt hac de re S. Sedis

<sup>5</sup> Mt. 4, 19.

<sup>6</sup> Mt. 9, 38.

<sup>7</sup> Cfr. C. I. C. can. 488 4°.

praescripta et commendationes. Nihilo tamen minus iamdiu desiderantur ordinationes generales, rite coordinatae et magis completae, Auctoritate Apostolica fultae, ab omnibus et ubique servandae, ut tantum negotium, quod animarum boni summopere interest, in tuto collocetur ac perpetuo et congruo conatu feliciter evolvatur ac perficiatur.

Opus enim tam praezellens constantem ipsius Apostolicae Sedis vigilantiam requirit; quandoquidem, non secus ac scholae clericales dioecesanae, utpote publica in Ecclesia instituta, sub huius actiosa cura et iugi moderatione, per Sacram Congregationem Seminariis Studiorumque Universitatibus praepositam, exstant,<sup>8</sup> eodem modo eodemque titulo propriae statum perfectionis scholae ab Ecclesia recognitae atque sancitae, publicae sunt, ac subsunt auctoritati Sacrae Congregationis Religiosorum Sodalium negotiis praepositae.<sup>9</sup>

Quas ob plures rationes iam anno MCMXXXIV in Sacrae huius Congregationis sinu Auctoritate Nostra Apostolica ratam habuimus « erectionem atque constitutionem... specialis Coetus seu Commissionis viro- rum idoneorum, quae omnes quaestiones ac negotia quavis ratione ad aspirantium et novitiorum iuniorumque sodalium cuiuslibet religionis ac societatis vitam communem viventium sine votis, religiosam et clericalem educationem atque in litteris scientiisque et ministeriis institutionem spectantia pertractet ».<sup>10</sup>

Qui coetus ex diversarum quidem Religionum nationumque viris peritis constans, inspectis cunctis quae iam exstabant documentis ad rem pertinentibus, collectisque undique notitiis ad normam Litterarum Circularium ad omnes Supremos Moderatores datarum,<sup>11</sup> opus ingens iam extruxerat, cum indictus est Congressus generalis statuum perfectionis anni MCML. Variis postea opportunis propositionibus in eodem prolatis usus, schemata iam parata ad trutinam revocavit et expolivit, quae denique Nostrae submissa sunt adprobationi.

Nunc igitur non pauca edicimus Statuta, praemissis tamen quibusdam fundamentalibus principiis et normis de religiosa, clericali atque apostolica alumnorum institutione et formatione, semper et ab omnibus prae oculis habendis.

<sup>8</sup> Cfr. C. I. C. can. 256.

<sup>9</sup> Cfr. C. I. C. can. 251; Pius XII, Const. Ap. *Provida Mater*, art. IV § 1, 2 febr. 1947, A. A. S. 39 (1947), 121 (*Enchiridion de statibus perfectionis*, Romae, 1949, n. 387, p. 584).

<sup>10</sup> S. C. de Religiosis, Decr. *Quo efficacius*, 24 ian. 1944, A. A. S. 36 (1944), 213 (*Enchiridion*, n. 381, pag. 560).

<sup>11</sup> S. C. de Religiosis, Litt. circ. *Quantum conferat*, 10 iun. 1944 (*Enchiridion*, n. 382, p. 561-564).

## II

Et primo quidem totius vitae sive religiosae, sive sacerdotalis et apostolicae fundamentum, quod divina vocatio appellatur, duplici veluti essentiali elemento constitui neminem ignorare volumus, divino scilicet altero, altero autem ecclesiastico. Ad primum vero quod attinet, Dei vocatio ad statum sive religiosum sive sacerdotalem ineundum tam necessaria dicenda est, ut si deficiat, ipsum fundamentum, quo totum nitatur aedificium, deficere dici debeat.

Quem enim Deus non vocat, gratia eius non movet nec adiuvat. Ceteroquin, si vera ad quemlibet statum vocatio eatenus divina quodammodo dicenda est, quatenus omnium statuum omniumque sive naturalium sive supernaturalium dispositionum donorumque principalis auctor ipse est Deus; quanto magis dici et esse debet religiosa et sacerdotalis vocatio, quippe quae tam sublimi fulgeat celsitudine, tot tantisque naturalibus et supernaturalibus ornamentis cumuletur, ut nonnisi a *Patre luminum*, a quo *omne datum optimum et omne donum perfectum*, descendere possint? <sup>12</sup>

Nunc vero, ut ad alterum vocationis religiosae et sacerdotalis elementum gressus fiat, docente Catechismo Romano, *vocari a Deo dicuntur, qui a legitimis Ecclesiae ministris vocantur*.<sup>13</sup>

Quod nedum iis quae de divina vocatione diximus, contradicat, arctissime potius cohaeret. Divina enim ad religiosum et clericalem statum vocatio, utpote qua quis in Ecclesia, societate scilicet visibili atque hierarchica, ad vitam sanctificationis publice ducendam et ad ministerium hierarchicum exercendum destinatur, a moderatoribus quoque hierarchicis, quibus Ecclesiae regimen divinitus commissum est, ex auctoritate comprobari, admitti atque regi debet.

Quod quidem omnes attendant oportet, quotquot huius generis vocationibus colligendis et probandis incumbunt. Neminem proinde umquam quovis modo ad statum sacerdotalem vel religiosum cogant,<sup>14</sup> neve ullum alliciant vel admittant, qui vera divinae vocationis signa reapse non praebeat; item ad ministerium clericale neminem promoveant, qui se religiosam solummodo vocationem divinitus recepisse demonstret; neve eos qui hoc quoque donum a Deo habuerint, ad saecularem clerum coar-

<sup>12</sup> Cfr. Iac. 1, 17.

<sup>13</sup> Catech. Rom. ad Parochos, cura Pii V editus, pars. II, cap. 7.

<sup>14</sup> Cfr. C. I. C. can. 971.



tent aut distrabant; neminemque tandem a sacerdotali statu avertant, qui divinitus ad illum vocari certis signis dignoscatur.<sup>15</sup>

Manifestum est enim in iis, qui ad clericalem militiam in perfectionis statu agendam adspirant et pro quibus hae normae statuuntur, una simul omnia convenire debere quae multiplicem huiusmodi vocationem religiosam, sacerdotalem et apostolicam constituendam requiruntur, omnesque proinde dotes et qualitates, quae ad haec Dei munera adeo excelsa adimplenda necessariae aestimantur, in iisdem inveniri oportere.

### III

Porro vocationis divinae germina qualitatesque ad eandem requisitas, ubi adsint, educatione atque formatione indigere, qua evolvantur et maturescant, omnibus compertum est. Nihil enim ubi primum nascitur, statim perfectum apparet, sed gradatim proficiendo perfectionem acquirit. Qua in evolutione moderanda, omnium sive eius qui divinitus vocatus est, sive locorum et temporum conditionum ratio habenda est, ut finis praestitutus efficaciter attingatur. Iuniorum itaque sodalium educatio et efformatio omnino segura, illuminata, solida, integra, sapienter et audacter hodiernis sive internis sive externis necessitatibus accommodata, adsidue exulta vigilanterque probata sit oportet, non ad religiosae solummodo, sed ad sacerdotalis quoque et apostolicae vitae perfectionem quod attinet.

Quae omnia, ut experiendo novimus, nonnisi probati ac selecti viri prae se ferre possunt qui, non modo doctrina, prudentia, discretionem spirituum, variaque rerum et hominum experientia aliisque humanis dotibus emineant, verum etiam Spiritu Sancto sint pleni atque sanctitate omniumque virtutum exemplo iuvenibus praefulgeant, quippe quos in toto institutionis negotio magis virtute et recte factis<sup>16</sup> quam dictis trahi compertum sit.

Hoc vero in gravissimo munere explendo educatoribus prima regula sit, quam Dominus enuntiavit in Evangelio dicens: « *Ego sum pastor bonus, bonus pastor animam suam dat pro ovibus suis... Ego sum pastor bonus et cognosco meas et cognoscunt me meae* », <sup>17</sup> quamque divus Bernardus hisce verbis expressit: « *discite subditorum matres vos esse de-*

<sup>15</sup> Cfr. C. I. C. can. 971.

<sup>16</sup> Cfr. C. I. C. can. 124.

<sup>17</sup> Io. 10, 11-12, 14.

*bere, non dominos; studete magis amari, quam metui* »;<sup>18</sup> atque ipsum Tridentinum Concilium Ecclesiasticos Moderatores saepissime adhortans, « *illud primum eos admonendos censeat, ut se pastores, non percussores esse meminerint, atque ita praeesse sibi subditis ut non eis dominantur, sed illos tamquam Filios et Fratres natu minores diligant: elaborentque ut, hortando et monendo, ab illicitis deterreant, ne ubi deliquerint, debitis eos poenis coërcere cogantur. Quos tamen si quid per humanam fragilitatem peccare contigerit, illa Apostoli est ab iis servanda praeceptio, ut illos arguant, obsecrent, increpent, in omni bonitate et patientia: cum plus erga corrigendos agat benevolentia quam austeritas, plus exhortatio quam comminatio, plus caritas quam potestas. Sin autem ob delicti gravitatem, virga opus fuerit, tunc cum mansuetudine rigor, cum misericordia iudicium, cum lenitate severitas adhibenda est: ut sine asperitate disciplina populis salutaris ac necessaria conservetur, et qui correcti fuerint emendentur, aut, si resipiscere noluerint, caeteri, salubri in eos animadversionis exemplo, a vitiis deterreantur* ».<sup>19</sup>

Meminerint insuper omnes, quotquot sodalibus instituendis quavis ratione praesunt, huiusmodi educationem et formationem organica progressionem et omnibus pro opportunitate aptis opibus et rationibus adhibitis impertiendam esse, totumque hominem sub omnibus suae vocationis aspectibus amplecti debere, ut reapse eum omni ex parte effingat « *hominem perfectum in Christo Iesu* ».<sup>20</sup> Ad opes autem rationesque institutionis quod attinet, manifestum est ea quae ab ipsa natura et humana huius quoque temporis inquisitione suppeditantur, si bona sint, minime spernenda esse, immo magni facienda et sapienter admittenda; nullus tamen error eo peior est, quo quis in tam lectis alumnis conformandis, rationibus huiusmodi naturalibus solum vel nimis innixus, supernaturalis ordinis instrumenta opesque postponit aut quacumque ratione negligit, quandoquidem ad religiosam et clericalem perfectionem apostolicis cumulatam fructibus assequendam, supernaturales opes, ut sacramenta, oratio, mortificatio, aliaque id genus, non necessaria solummodo, sed primaria et essentialia omnino sunt.

Quo tamen rationum atque operum ordine servato, nihil prorsus neglegatur, quod ad corpus animumque perficiendum, ad omnes naturales virtutes excolendas, et ad integram humanitatem viriliter conformandam quolibet modo conferat, ita ut supernaturalis deinde sive religiosa

<sup>18</sup> In *Cantica*, Sermo 23, Migne, P. L. 183, 885 B.

<sup>19</sup> Cfr. *O. I. C.* can. 2214 § 2; Conc. Trid., sess. XIII, de *ref.*, cap. 1.

<sup>20</sup> Col. 1, 28.

sive sacerdotalis institutio huic solidissimo inhaereat naturalis honestatis excoltaeque humanitatis fundamento,<sup>21</sup> siquidem hominibus eo facilius securiorque ad Christum via patet, quo in sacerdotis persona evidentior ipsis appareat « *benignitas et humanitas Salvatoris nostri Dei* ».<sup>22</sup>

Verum, quamquam magni ab omnibus facienda est religiosi cleri humana naturalisque institutio, primum tamen procul dubio locum in toto formationis curriculo obtinet supernaturalis animae sanctificatio. Nam si de omni christiano monitum Apostoli valet testantis: « *Haec est enim voluntas Dei, sanctificatio vestra* », <sup>23</sup> quanto magis ad id tenetur, qui, non modo sacerdotio est auctus, sed ipsam perfectionem evangelicam sibi acquirendam publice professus est, immo suo ipsius munere adeo ceterorum sanctificationis instrumentum constituitur, ut ab eius sanctitate ipsa animarum salus et regni Dei incrementum non parum pendeat?

Meminerint igitur omnes statuum perfectionis evangelicae acquirendae sodales, atque frequenter coram Deo recogitent, sibi non sufficere ad officium suae professionis implendum peccata sive gravia, sive etiam, Deo auxiliante, venialia vitare, neque materialiter solummodo exsequi Moderatorum praecepta, aut etiam vota seu vincula quibus conscientia adstringatur, vel proprias quoque constitutiones, secundum quas, ipsa Ecclesia in sacris canonibus praecipiente, « *omnes et singuli religiosi, Superiores aequae ac subditi, debent... vitam componere atque ita ad perfectionem sui status contendere* ».<sup>24</sup> Haec enim omnia pleno animo flagrantique amore agant oportet, non tantum ex necessitate, *sed etiam propter conscientiam*,<sup>25</sup> quandoquidem, ut in sanctimoniae culmina ascendere, utque vivos christianae caritatis fontes sese omnibus praebere valeant, incensissima erga Deum et proximos caritate flagrare atque omni virtute ornati esse debent.

#### IV

Ubi autem huic animae sanctificationi provisum sit, accuratissima quoque religiosi cleri sive intellectualis sive pastoralis institutio cu-

<sup>21</sup> Cfr. *Phd.* 4, 8.

<sup>22</sup> *Tlt.* 3, 4.

<sup>23</sup> *1 Thess.* 4, 3.

<sup>24</sup> Cfr. *C. I. C.* can. 593.

<sup>25</sup> *Rom.* 13, 5.

randa erit, de qua pro rei momento et supremi Nostri officii conscientia paulo fusiora principia proponere et commendare volumus.

Quanta enim sit istis religiosis sodalibus necessitas solidae eiusdemque numeris omnibus absolutae institutionis et formationis intellectuales, ex triplici praesertim qua in Dei Ecclesia dignitate praefulgent, scilicet religiosa, sacerdotali et apostolica, aperte colligitur.

Religiosi enim viri, quibus hoc praecipuum officium incumbit, ut nempe Deum unice requirentes eique adhaerentes divina contemplantur, aliisque tradant, meminerint se nullatenus hoc sanctissimo munere rite ac fructuose fungi posse et ad sublimem cum Christo coniunctionem efferri, si copiosa illa destituantur, quae e sacris doctrinis hauritur, Dei eiusque mysteriorum profunda et indesinenter perficienda cognitione.<sup>26</sup>

Sacerdotalis vero dignitas, qua qui fulget Domini scientiarum<sup>27</sup> legatus constituitur atque *sal terrae et lux mundi* peculiari ratione appellatur,<sup>28</sup> plenissimam ac solidam exigit in ecclesiasticis praesertim disciplinis institutionem, eiusdem scilicet quae ipsius sacerdotis spirituales vitam nutrire atque fulcire valeat eumque a quovis errore aberrantique novitate immunem servare; quae insuper eum reddat fidelem *mysteriorum Dei* dispensatorem<sup>29</sup> et perfectum hominem Dei *ad omne opus bonum instructum*.<sup>30</sup>

Apostolicum denique munus, quod pro sua quisque vocatione, statuum perfectionis sodales in Ecclesia exercent, sive sacris ad populum contionibus, sive puerorum et iuvenum christiana institutione, sive sacramentorum praesertim paenitentiae administratione, sive sacris ad infideles expeditionibus, sive animarum in vita spirituali moderatione, sive tandem in ipsa cum populo cotidianae vitae consuetudine, uberiores eosque perpetuo mansuros fructus producere minime poterit nisi ipsi sacram doctrinam plane cognitam et studio numquam intermittendo penitus perspectam habeant.

Ad quam solidam et absolutissimam intellectus institutionem et formationem, pro naturali iuvenum progressionem studiorumque distributione, assequendam, curent imprimis religionum Moderatores omni adhibita industria ut litterarum doctrinarumque cognitione religiosi alum-

<sup>26</sup> Cfr. Pius XI, Ep. ap. *Unigenitus Dei Filius*, 19 mart. 1924. A. A. S. 16 (1924), 137-138 (*Enchiridion*, n. 348, p. 403-404).

<sup>27</sup> Cfr. 1 Reg. 2, 3.

<sup>28</sup> Cfr. Mt. 5, 13-14.

<sup>29</sup> Cfr. 1 Cor. 4, 1-2.

<sup>30</sup> Cfr. 2 Tim. 3, 17.

ni « iis nihil saltem cedant qui e laicis iuvenibus pari sint disciplinae auditores. Hoc namque si cautum fuerit, et ut discipulorum mentes severius expoliantur, et ut facilius eorum habeatur suo cuiusque tempore dilectus », <sup>31</sup> et etiam ut iidem alumni ad ecclesiasticas disciplinas altius addiscendas praeparentur aptisque instruantur subsidiis cautum sane erit.

In disciplinis autem sive philosophicis sive theologicis per idoneos solummodo accurateque selectos magistros tradendis sanctissime ea omnia servantur quae a sacris canonibus et a Nostreis Decessoribus aequae ac a Nobis ipsis praescripta sunt, de debita praesertim Magisterio Ecclesiastico reverentia atque omnimoda fidelitate semper et ubique profitenda et discipulorum mentibus animisque instillanda, de prudentia et cautela quae semper socianda est cum diligentissima eaque maximo-pere commendanda pervestigatione novarum, quae progrediente aetate exsurgunt, quaestionum, deque Angelici Doctoris ratione, doctrina et principiis sancte tenendis atque in philosophica et theologica alumnorum institutione omnino sequendis. <sup>32</sup>

Aquinate autem duce et magistro, theologia methodo positiva simul et scholastica, quae dicitur, tradatur, ita nempe ut, praelucente authentico Magisterio, Divinae Revelationis fontes accuratissime congruisque subsidiis adhibitis perscrutentur indeque hausti veritatis thesauri clare exponantur et efficaciter vindicentur. Cum enim Revelationis depositum soli Ecclesiae Magisterio authentice interpretandum commissum sit, non ratione mere humana et privato iudicio, sed iuxta sensum et ad mentem ipsius Ecclesiae fidelissime explicandum est. Sciant igitur christianae philosophiae et theologiae magistri se non proprio iure ac nomine, sed nonnisi supremi Magisterii nomine et auctoritate ac proinde sub eius vigilantia et moderatione, a quo canonicum veluti munus acceperunt, suo ministerio fungi; quapropter, salva quidem de iis quae disputationi adhuc subsunt iusta opinandi libertate, « *probe meminisse debent non idcirco sibi factam esse potestatem docendi, ut sua opinionum placita cum alumnis disciplinae suae communicent, sed ut iis doctrinas Ecclesiae probatissimas impertiant* ». <sup>33</sup>

Omnes praeterea, tum magistri tum discipuli, prae oculis semper

<sup>31</sup> PIUS XII, Adhort. ap. *Menti nostrae*, 23 sept. 1950, A. A. S. 42 (1950), 687.

<sup>32</sup> PIUS XII, Litt. enc. *Humani generis*, 12 aug. 1950, A. A. S. 42 (1950) 573, 577-578; C. I. C. can. 1366.

<sup>33</sup> S. PIUS X, Motu pr. *Doctoris Angelici*, 29 iun. 1914, A. A. S. 6 (1914), 338 (*Enchiridion*, n. 284, p. 336).



habeant studia ecclesiastica non ad intellectualem solummodo institutionem, sed ad integram et solidam sive religiosam, sive sacerdotalem et apostolicam formationem spectare; ideoque non ad scholarum tantummodo periculum superandum dirigenda esse, sed ad quamdam quasi formam alumnorum animis imprimendam, quae nunquam elabatur, et ex qua, cum usus postulabit, lumen atque robur pro suis aliorumque necessitatibus semper hauriant.<sup>34</sup>

Ad quod assequendum, sit imprimis intellectualis instructio arcte cum precationis studio divinarumque rerum contemplatione coniuncta; sit deinde plena, nulla ex praescriptis disciplinis parte praetermissa, cohaerens insuper sit omnique ex parte ita composita et integra, ut disciplinae omnes in unum dumtaxat systema idque solidum et apte temperatum conspirent; sit quoque nostrorum temporum erroribus refellendis ac necessitatibus iuvandis sapientissime aptata; itemque sit recenter inventis instructa ac simul venerandae traditioni apprimè consonans; sit denique ad pastoralia cuiusvis generis munera fructuose obeunda efficaciter ordinata, ita quidem ut qui futuri sunt sacerdotes, ea instructi, expedite et accurate valeant sanam doctrinam cum rudibus tum doctis in concionibus et catechesibus proponere ac tueri, rite sacramenta administrare, animarum bonum actuose promovere omnibusque verbo et opere prodesse.

Quamvis autem ea omnia quae de spiritali et intellectuali alumnorum institutione hucusque diximus ad viros vere apostolicos effingendos maximopere conferant et plane requirantur, ita ut si debita sanctitas et scientia sacerdoti desint, omnia ei deesse compertum sit; gravissimo tamen officio Nostro ut obsequamur, addere hic debemus, praeter sanctitatem et scientiam congruentem, ad apostolicum ministerium rite implendum omnino postulari in sacerdote accuratissimam et omni ex parte perfectam pastorem praeparationem, eam scilicet, qua vera peritia et dexteritas in multiplicibus christiani apostolatus muneribus rite obeundis gignatur et efformetur.

Si enim suae cuique arti exercendae diligens praehaberi solet sive theoretica, quae dicitur, sive technica, sive practica eaque diuturno tirocinio firmata praeparatio, parem immo multo accuratiorem et altior formationem quis praehabendam esse neget illi, quae non immerito ars artium appellatur?

<sup>34</sup> Cfr. Pius XII, Sermo ad alumnos, 24 Iun. 1939, A. A. S. 31 (1939), 246 (*Enchiridion*, n. 373, p. 531).

Haec vero pastoralis alumnorum conformatio, ab ineunte studiorum curriculo inchoanda, progrediente vero aetate gradatim perficienda, absoluto tandem theologico curriculo per peculiare tirocinium consummanda, pro suo cuiusque religiosi instituti finem, ad hoc imprimis contendere debet, ut ii qui Christi futuri sint ministri et apostoli, ad ipsius Christi formam spiritu et virtutibus apostolicis solide et penitus imbuantur et exercentur, ardenti scilicet et purissimo provehendae Dei gloriae studio, actiuosa et flagranti in Ecclesiam eiusque iura tuenda et doctrinam retinendam provehendamque caritate, incensissimo animarum salutis procurandae zelo, supernaturali in loquendo et operando prudentia cum evangelica simplicitate coniuncta, humili sui abnegatione et obsequentissima Moderatoribus subiectione, firmissima Dei fiducia et acuta sui officii conscientia, virili in negotiis suscipiendis sollertia atque in coeptis prosequendis constantia, sedula in officiis obeundis fidelitate, atque magno ad fortissima quaeque patienda et faciendo animo, christiana denique, quae omnes alliciat, amabilitate atque humanitate.

Ad aliud praeterea in pastoralis institutione tradenda contendendum est, ut scilicet, pro studiorum gradu atque progressionem, iis omnibus disciplinis alumni instituatur, quae ad « *bonum militem Christi Iesu* »<sup>35</sup> omni ex parte efformandum aptisque apostolicis armis locupletandum omni ope conferre possint. Praeter igitur philosophica et theologica studia ad pastoralement actionem opportune, ut diximus, ordinanda, necesse omnino est ut futuris dominici gregis pastoribus per peritos magistros et ad huius Apostolicae Sedis normas tradatur ea de rebus psychologicis et paedagogicis, didacticis et catecheticis, socialibus et pastoralibus aliisque id genus eruditio, quae harum disciplinarum hodierno progressui respondeat, quaque illos multiplicibus nostrorum temporum apostolatus necessitatibus idoneos paratosque efficiat.

Quam doctrinalem de re apostolica institutionem et formationem, ut usum et experientia firmetur, practica quoque, quae dicitur, per gradus sapienter progrediens prudenterque moderanda exercitatio comitetur oportet, quam peculiari deinde post adeptum sacerdotium tirocinio peritissimis viris sive doctrina sive consilio et exemplo moderantibus, exercendam et perficiendam esse volumus, et studiis sacris numquam intermissis, continuo solidandam.

Postquam haec praemisimus summa principia, quibus sive institutio-

<sup>35</sup> 2 Tim. 2, 3.

nis opus, sive educatores et educandi informari regique debent, iam generales normas circa singula gravissimi negotii capita, omnibus mature perpensis, certa scientia ac de Apostolicae potestatis plenitudine decernimus atque statuimus ab omnibus, ad quos pertinent, servari. Sacrae Congregationi de Religiosis potestatem insuper facimus Nostra Auctoritate per ordinationes, instructiones, declarationes, interpretationes aliaque id genus documenta, Statuta Generalia, iam a Nobis probata, ad effectum adducere omniaque illa peragere, quae ad Constitutionem atque Statuta Ordinationesque fideliter observanda spectant.

Contrariis quibuslibet non obstantibus, peculiari etiam mentione dignis.

Datum Romae, apud Sanctum Petrum, die trigesimo primo mensis Maii anno Domini millesimo nongentesimo quinquagesimo sexto, B. V. Mariae mundi Reginae sacro, Pontificatus Nostri decimo octavo.

PIUS PP. XII

## LITTERAE APOSTOLICAE

### I

BEATA VIRGO MARIA « A BONO IESU », VULGO « MADONNA DEL BUON GESÙ »  
APPELLATA, UNA CUM S. IOANNE BAPTISTA, PRAECURSORE DOMINI ET MARTYRE,  
PATRONA CAELESTIS CIVITATIS ET DIOECESIS FABRIANENSIS CONSTITUITUR.

PIUS PP. XII

Ad perpetuam rei memoriam. — Magno afficimur gaudio cum fere quotidie Nobis compertum sit vota, quae in indicendo Anno Mariano primo exeunte saeculo a definito dogmate Immaculatae Conceptionis Beatae Mariae Virginis Nos protulimus, studiosa voluntate Venerabilium Fratrum Episcoporum Ecclesiae universae et Christifidelium omnium feliciter expleri. Sacrorum enim Antistites, Religiosarum Sodalitatum Moderatores, ipsi quoque publicae rei praepositi et christiana plebs quasi nobili certamine inter se contendunt ut in unaquaque non solum Natione et Regione sed in singulis etiam dioecesibus et parocciis, pietas in Sanctissimam Deiparam magis magisque incrementum capiat et constantiam consequatur. Quos inter animarum Pastores adnumerandus nunc est Venerabilis Frater Lucius Crescenzi, Episcopus Fabrianensis et Mathe-licensis, qui, universi Cleri et populi civitatis et dioecesis Fabrianensis

studiosa vota expromens, Nos humiliter sed enixe rogavit ut Beatissima Virgo Maria « a Bono Iesu », seu vulgari titulo « Madonna del Buon Gesù » eiusdem civitatis et dioecesis praecipuam caelestem Patronam una cum Sancto Ioanne Baptista, Domini Praecursore et Martyre, constituere et declarare dignaremur. Ipsa enim Beatissima Virgo, cuius pictam imaginem S. Iacobum Picenum, praeclarum S. Francisci Assisiensis alumnum et concionatorem celeberrimum, civibus Fabrianensibus dono dedisse tradunt, hoc suavissimo et singulari titulo a pluribus saeculis in suo parvo sed ornatissimo sacello iugiter invocata, numquam defuit devotorum civium necessitatibus materna sollicitudine subvenire, preces benigna exaudire, lacrimas etiam, praesentissima solatrix, tergere. Adeo tamen eadem Sacra Imago inclaruit inde prodigiis ut Capitulum Vaticanum, precibus sibi oblatis libenter obsecundans, aureis coronis tam Divini Infantis quam eius Sanctissimae Matris capita redimiri sua auctoritate decreverit: quod die VIII Septembris, anno MDCCCXCVIII feliciter factum est. Quae cum ita sint, praelaudati Episcopi, eiusque Cleri et fidelis populi vota explere volentes, certa spe freti Fabrianensium amorem erga dulcissimam Dei parentem intentiorem fieri, ex Sacrae Rituum Congregationis consulto, certa scientia ac matura deliberatione Nostra, deque Apostolicae potestatis plenitudine, harum Litterarum vi perpetuumque in modum, Beatissimam Virginem Mariam « a Bono Iesu », seu vulgo « Madonna del Buon Gesù », Fabrianensis civitatis et dioecesis una cum Sancto Ioanne Baptista, Praecursore Domini et Martyre, caelestem apud Deum *Patronam* constituimus et declaramus, omnibus adiectis honoribus et privilegiis liturgicis, quae praecipuis locorum Patronis rite competunt. Contrariis quibusvis nihil obstantibus. Haec edicimus, statuimus, decernentes praesentes Litteras, firmas, validas atque efficaces iugiter exstare ac permanere: suosque plenos atque integros effectus sortiri et obtinere; illisque ad quos spectant, seu spectare poterunt, nunc et in posterum, plenissime suffragari: sicque rite iudicandum esse ac definiendum: irritumque ex nunc et inane fieri, si quidquam secus, super his, à quovis, auctoritate qualibet, scienter sive ignoranter attentari contigerit.

Datum ex Arce Gandulfi, sub anulo Piscatoris, die VIII mensis Septembris, Nativitati Beatae Mariae Virginis sacro, anno MCMLIV, Pontificatus Nostri sexto decimo.

De speciali mandato Sanctissimi  
Pro Domino Cardinali a publicis Ecclesiae negotiis

GILDO BRUGNOLA  
a Brevibus Apostolicis

## II

BEATA MARIA V. IN CAELUM ASSUMPTA PRAECIPUA CAELESTIS PATRONA DIOECESIS  
UMTATANAE DECLARATUR.

## PIUS PP. XII

Ad perpetuam rei memoriam. — Recens constitutas ab hac Apostolica Sede dioeceses expedit Caelitum praesidio obtegi, quo vigeant magis felicioribusque augeantur incrementis. Cum igitur Venerabilis Frater Iosephus Grueter, Episcopus Umtatanus, in Africa australi, a Nobis petiisset, ut Beatam Mariam Virginem sideribus receptam suae Dioecesis, anno MDCCCCLI a Nobis erectae, Caelestem Patronam renuntia-remus, Nos vota huiusmodi libenti animo statuimus explere eo consilio ducti, ut, eiusdem Deiparae deprecatione, res Catholica ea in regione magis proveheretur, atque Christifideles ibi degentes religionis institutis penitus haerent. Quapropter, ex Sacrae Rituum Congregationis consulto omnibusque diligenter perpensis, certa scientia ac matura deliberatione Nostra deque Apostolicae potestatis plenitudine, harum Litterarum vi perpetuumque in modum Beatam Mariam Virginem in Caelum Assumptam totius dioecesis Umtatanae praecipuam apud Deum caelestem *Patronam* constituimus ac declaramus, omnibus adiectis honoribus ac privilegiis liturgicis, quae principalibus dioecesium Patronis rite competunt. Contrariis quibusvis non obstantibus. Haec edicimus, statuimus, decernentes praesentes Litteras firmas, validas atque efficaces iugiter exstare ac permanere; suosque plenos atque integros effectus sortiri et obtinere; illisque, ad quos spectant, seu spectare poterunt, nunc et in posterum plenissime suffragari, sicque rite iudicandum esse ac definiendum; irritumque ex nunc et inane fieri, si quidquam secus, super his, a quovis, auctoritate qualibet, scienter sive ignoranter attentari contigerit.

Datum ex Arce Gandulfi, sub anulo Piscatoris, die XVI mensis Novembris, anno MDCCCCLIII, Pontificatus Nostri sexto decimo.

De speciali mandato Sanctissimi  
Pro Domino Cardinali a publicis Ecclesiae negotiis

GILDO BRUGNOLA  
*a Brevibus Apostolicis*



## III

BEATA MARIA V.,(A GIBILMANNA) APPELLATA, PRAECIPUA PATRONA TOTIUS  
DIOECESIS CEPHALUDENSIS EADEMQUE SUB TITULO IMMACULATAE CONCEPTIONIS VENERATA, PRIMARIA PATRONA URBIS CEPHALUDII CONSTITUITUR.

## PIUS PP. XII

Ad perpetuam rei memoriam. — Quasi arx imminens turbidis saeculi fluctibus firmumque religionis propugnaculum habenda est Aedes Deiparae sacra, quae, in clivo montis Sancti Angeli, subter quem caeruleum sternitur maris aequor, haud procul ab urbe Cephaludio constituta, e loci nomine Templum Beatae Mariae Virginis a Gibilmanna nuncupatur. Eo solent ascendere perfrequentes Christifideles ut tamquam filii Caelestem Matrem omni prosequantur genere honoris, eius deprecatione munera accipiant superna, eius fruantur rebus in adversis praesenti auxilio. Hoc etiam prae Nobis ferendum est Augustae Virginis Imaginem, ibi tantopere exultam, Mariano hoc vertente Anno, in singulas perlatam esse dioecesis curias magno cum fidelium concursu piaque alacritate. Exinde, ut accepimus, amplissimi sunt, Deiparae beneficio, percepti fructus, quandoquidem multi a prava consuetudine ad vitam frugis, a minus diligenti religionis exercitatione ad crebrum Sacramentorum usum sunt traducti. His omnibus una voluntas fuit et unum votum, ut Alma Dei Genetrix a Gibilmanna totius dioecesis Cephaludensis renuntiaretur praecipua Patrona. Quibus optatis lectissimum principis Templi Canoniorum Collegium suffragatum est, has adiungens preces, ut eidem Deiparae, qua Virgini sine originis labe conceptae, committeretur tamquam singulari tutrici ipsa urbs, dioecesis caput et mater. Quas pias supplicationes depromens, Venerabilis Frater Aemilianus Cagnoni, Cephaludensis Episcopus, Nos rogavit, ut Beatam Mariam Virginem a Gibilmanna appellatam totius, cui praeesset, dioecesis, eandemque, ab origine omnis noxae immunem, urbis Cephaludii dicere-mus Caelestem Patronam. Hisce precibus pro Nostro Marianae religionis provehendae studio libenti animo concedentes, Nos, ex Sacrae Rituum Congregationis consulto, certa scientia ac matura deliberatione Nostra deque Apostolicae potestatis plenitudine, harum Litterarum vi perpetuumque in modum Beatam Mariam Virginem, nomine Mariae

Sanctissimae de Gibilmanna veneratam, totius dioecesis Cephaludensis, eandemque, mysterio Immaculatae Conceptionis insignem, urbis Cephaludii primariam apud Deum *Caelestem Patronam* eligimus ac declaramus, omnibus adiectis honoribus ac privilegiis liturgicis, quae principalibus dioecesium vel locorum Patronis rite competunt. Contrariis quibusvis nihil obstantibus. Haec edicimus, statuimus, decernentes praesentes Litteras firmas, validas atque efficaces iugiter exstare ac permanere; suosque plenos atque integros effectus sortiri et obtinere; illisque, ad quos spectant seu spectare poterunt, nunc et in posterum plenissime suffragari; sicque rite iudicandum esse ac definiendum; irritumque ex nunc et inane fieri, si quidquam secus, super his a quovis, auctoritate qualibet, scienter sive ignoranter attentari contigerit.

Datum Romae, apud Sanctum Petrum, sub anulo Piscatoris, die III mensis Decembris, anno MDCCCLIII, Pontificatus Nostri sexto decimo.

De speciali mandato Sanctissimi  
Pro Domino Cardinali a publicis Ecclesiae negotiis

GILDO BRUGNOLA  
*a Brevibus Apostolicis*

#### IV

BEATA MARIA V., NOMINE « AUXILIUM CHRISTIANORUM » INVOCATA, PRIMARIA PATRONA, ET S. PATRICIUS, PONT. ET CONF., SECUNDARIUS PATRONUS, DIOECESIS BUMBURIENSIS DECLARANTUR.

#### PIUS PP. XII

Ad perpetuam rei memoriam. — Amica lucet stella hominibus, in huiusce saeculi mari fluctibus exasperato, quam si respiciant, a recto non aberrant itinere, quam si sequantur, ad portum salutis feliciter perveniunt. Hanc enim dicimus Beatam Mariam Virginem, quam Deus clementissimus dedit opiferam Matrem iis, qui in huius vitae peregrinatione essent constituti. Non perperam igitur Venerabilis Frater Lancillottus Goody, Episcopus dioecesis Bumburiensis, anno praeterito per Nos conditae, petiit ut hanc eiusdem Deiparae, quae ut « Auxilium Christianorum » solet invocari, tutelae committeremus, et ut alterum eidem tribueremus Patronum, Sanctum Patricium, qui ex Anglis oriun-

du, Hiberniae gentem ad veram Christi religionem traduxit. Quibus supplicationibus libenti animo concedentes, Nos ex Sacrae Rituum Congregationis consulto, certa scientia ac matura deliberatione Nostra deque Apostolicae potestatis plenitudine, harum Litterarum vi perpetuumque in modum Beatam Mariam Virginem, nomine « Auxilium Christianorum » invocata, primariam dioecesis Bumburiensis *Patronam*, et Sanctum Patricium, Pontificem et Confessorem, secundarium eiusdem *Patronum* constituimus ac declaramus, omnibus adiectis honoribus ac privilegiis liturgicis, quae huiusmodi Patronis dioecesium rite competunt. Contrariis quibusvis nihil obstantibus. Haec edicimus, statuimus, decernentes praesentes Litteras firmas, validas atque efficaces semper exstare ac permanere; suosque plenos atque integros effectus sortiri et obtinere; illisque, ad quos spectant seu spectare poterunt, nunc et in posterum plenissime suffragari; sicque rite iudicandum esse ac definendum; irritumque ex nunc et inane fieri, si quidquam secus, super his, a quovis, auctoritate qualibet, scienter sive ignoranter attentari contigerit.

Datum Romae, apud Sanctum Petrum, sub anulo Piscatoris, die v mensis Martii, anno MDCCCCLV, Pontificatus Nostri septimo decimo.

De speciali mandato Sanctissimi  
Pro Domino Cardinali a publicis Ecclesiae negotiis

GILDO BRUGNOLA  
a *Brevibus Apostolicis*

## V

CONSTITUTIONES APPROBANTUR CONGREGATIONIS SORORUM SERVULARUM BEATISSIMAE VIRGINIS MARIAE IMMACULATAE.

## PIUS PP. XII

Ad perpetuam rei memoriam. — Sacra in claustra ab antiquissimis temporibus secedere consueverant, divinae cuidam impulsioni obsecuti, viri ac feminae, ubi saeculi contagia fugerent, vitae melioris insisterent viam atque Deo hominumque societati, ad Evangelii rationem, deservirent. Quodsi Ecclesiae Latinae huiusmodi instituto eximium additur decus, non minorem laudem eodem sibi peperit Ecclesia Orientalis, quae Antonium genuit, Paulum, Basilium aliosque insignes huiusce vitae generis auctores sectatoresque. Divino igitur afflante Numine, die festo

Beatae Mariae Virginis sideribus receptae, anno MDCCCLXXXII, in provincia Haliciensi condita est sacrarum virginum Sodalitas, quam propter religionem Augustae Deiparae, primae labis exsortis, appellaverunt Congregationem Sororum Servularum Beatissimae Virginis Mariae Immaculatae. Ad quam constituendam uterque Clerus potissimum vero Ieremias Lomnickyj, Ordinis Basiliani alumnus, et Cyrillus Selecky, oppidi curio, quod Zuzel vulgo audit, opus atque studium egregium contulerunt. Sollemni ergo die, quem diximus, novem piae mulieres, praeunte Michaëla Hordaszevska, religiosam vestem rite sumpserunt, scilicet Ecclesia ornata est novello germine florum. Dei Optimi Maximi Eiusque purissimae Matris beneficio, sacer hic coetus miris auctus est incrementis, quandoquidem permultae puellae, a vanis fluxisque saeculi rebus aversae, eidem sese aggregabant atque plura coenobia, virtutis caritatisque domicilia, Christifidelibus stipem largientibus, sunt constituta. Neque praetermittendum huiusmodi vim ac vigorem praesertim, tamquam e capite, manasse a noviciarum domo Christinopolitana, ubi puellae Deo dicandae Basilianis Sodalibus utebantur magistris ad ineundam altioris sanctiorisque vitae rationem. Temporis autem successu haec Servularum Beatissimae Virginis Mariae Immaculatae consociatio non solum in Slavicas gentes, plagas meridianas incolentes, sed etiam in longinquas Americae regiones est propagata, ubi populares patria extorres ac Byzantini ritus sectatores, habitarent. Nec modici ex eiusdem ministerio et opere percepti sunt fructus: parvuli christianae fidei praeceptis eruditi, puellae ad virtutem et humanitatem informatae, senio graves quovis levamento refecti, liturgiae decor servatus et auctus, aliaque patrata plurima, quae Christifidelium saluti et utilitati conducere. Pulcherrima vero hae Deiparae famulae tulerunt tropaea, cum earum nonnullae, in patria per vulnera fuso sanguine Divinum Sponsum testatae, purpurea corona sint insignitae. Quae Sodalitas ut recte constitueretur, anno MDCCCXVII leges promulgatae sunt, eius aptae institutis; neque, ut in dies magis firmaretur, Sedis Apostolicae defuit peculiaris cura et opera adiutrix. Eius auctoritate Capitulum Generale coactum est, quod novas proponeret Constitutiones ad aetatem nostram accommodatas. Quas diligenter cognitae Sacrum Consilium Ecclesiae Orientali praepositum in septem annos, experimenti causa, approbavit. Nunc vero, exanclati a sacris hisce virginibus labores, atque egregia opera confecta suadent, ut leges huiusmodi e Nostra auctoritate certae habeantur atque ratae. Fore autem confidimus ut hac propensae voluntatis Nostrae significatione religiosae hae mulieres impensius usque vitae sanctimoniam assectentur,

pri laboris praeclariora usque edant specimina, et, quae premantur angustiiis, releventur et ad virtutem et constantiam confirmantur. Precibus igitur de hisce legibus modo certo probandis benigne concedentes, Nos, e Sacrae Congregationis Ecclesiae Orientali praepositae consulto, omnibus perpensis, certa scientia ac matura deliberatione Nostra deque Apostolicae potestatis plenitudine, harum Litterarum vi perpetuumque in modum Constitutiones Congregationis Sororum Servularum Beatissimae Virginis Mariae Immaculatae, ab eodem Sacro Consilio iterum recognitas et ad Litteras Apostolicas motu proprio expeditas, quarum prima verba sunt: «Postquam Apostolicis Litteris» accommodatas, approbamus et confirmamus iisque Apostolicae sanctionis robur adicimus, dummodo convenient cum exemplo, quod in Tabulario Sacrae Congregationis memoratae asservatur et cuius hoc est initium: «Finis generalis Congregationis est quaerere gloriam Dei», exitus vero: «Perfectius Deo servire valeant». Hisce simul Litteris Nostraque auctoritate abrogamus et abrogata esse declaramus ea omnia, quae hisce Constitutionibus, per Nos approbatis, non continentur. Contrariis quibusvis non obstantibus. Haec edicimus, statuimus, decernentes praesentes Litteras firmas, validas, atque efficaces iugiter exstare ac permanere; suosque plenos atque integros effectus sortiri et obtinere; illisque ad quos spectant seu spectare poterunt, nunc et in posterum plenissime suffragari; sicque rite iudicandum esse ac definiendum; irritumque ex nunc et inane fieri, si quidquam secus, super his, a quovis, auctoritate qualibet, scienter sive ignoranter attentari contigerit.

Datum Romae, apud Sanctum Petrum, sub anulo Piscatoris, die XVIII mensis Ianuarii, anno MDCCCLVI, Pontificatus Nostri septimo decimo.

De speciali mandato Sanctissimi  
Pro Domino Cardinali a publicis Ecclesiae negotiis

GILDO BRUGNOLA  
*a Brevibus Apostolicis*

---







LIBRERIA EDITRICE VATICANA  
CITTÀ DEL VATICANO

# MISSALE ROMANUM

EX DECRETO SACROSANCTI CONCILII TRIDENTINI  
RESTITUTUM SUMMORUM PONTIFICUM CURA RECOGNITUM

## EDITIO SEXTA POST TYPICAM

CUM OMNIBUS INNOVATIONIBUS LITURGICIS MAIORIS HEBDOMADAE  
PROPRIO LOCO POSITIS

Typi clarissimi rubri et nigri. Charta manufacta, eburneata, pp. LXXIV-782 [272.]  
In festis principalioribus imagines et primæ litteræ novæ, tribus conspicuæ coloribus;  
item tabula, octo coloribus expressa. Religionis genus varium, solidum, venustum.  
Apparatus signaculorum pro singulis exemplaribus.

	Editio in-4 <sup>o</sup> (cm. 20,5×28)	Editio in-8 <sup>o</sup> (cm. 18,5×25)
Solutum . . . . .	Lib. 9.800 (\$ 16,50)	Lib. 6.000 (\$ 10,—)
A) Linteo contextum, cum sectione foliorum rubra . . . . .	— —	» 7.300 (\$ 12,—)
B) Partim linteo, partim corio contextum, cum sectione foliorum rubra . . . . .	» 12.000 (\$ 20,50)	» 7.800 (\$ 13,—)
C) Partim linteo, partim corio contextum, cum sectione foliorum aurea . . . . .	» 13.000 (\$ 21,50)	» 8.800 (\$ 15,—)
D) Corio caprino, contextum, cum sectione foliorum aurea, et ornamentis aureis decoratum . . . . .	» 17.000 (\$ 28,50)	» 11.000 (\$ 18,50)
E) Corio caprino optimo contextum, cum sectione foliorum rubra-aurata, et ornamentis aureis copiose distinctum, cum theca . . . . .	» 22.000 (\$ 37,—)	» 15.000 (\$ 25,50)

Sine religionis prelii augmento, addi poterunt Propria Diocessuum seu Congregationum; quas tamen ab emptore mittenda erunt

# CANON MISSAE

AD USUM  
EPISCOPORUM AC PRAELATORUM  
SOLEMNITER VEL PRIVATE CELEBRANTIUM  
CUI ACCEDUNT FORMULAE VARIAE E PONTIFICALI ROMANO  
DEPROMPTAE ET CANTUS AD LIBITUM

Editio in-4<sup>o</sup> (cm. 26,5×37), pp. 192

Typi clarissimi rubri et nigri. Charta manufacta, eburneata  
Tabula octo coloribus conspicua. Religionis genus varium, solidum, venustum  
Apparatus signaculorum pro singulis exemplaribus

Sicut in editione sexta post typicam Missalis Romani, in Missae praeparatione et gratiarum actione psalmi relati sunt iuxta novam interpretationem, itemque textus orationis ante Missam « Summe Sacerdos » ad normam criticae editionis redactus est, necnon aliae variationes ibidem allatae.

- Solutum L. 8000 (\$ 14)
- 1) Partim linteo, partim corio contextum, cum sectione foliorum aurea L. 10.000 (\$ 17)
  - 2) Corio caprino contextum, cum sectione foliorum aurea, et ornamentis aureis decoratum L. 16.500 (\$ 28)
  - 3) Corio caprino optimo contextum, cum sectione foliorum rubro-aurata, et ornamentis aureis copiose distinctum L. 22.000 (\$ 37)

**LIBRERIA EDITRICE VATICANA**  
**CITTÀ DEL VATICANO**

---

**SACRAE ROMANAE ROTAE  
DECISIONES SEU SENTENTIAE**

QUAE PRODIERUNT ANNO XXXVIII (1946)

cura eiusdem S. Tribunalis editae

Editio in-8°, pp. viii-684 Lit. 4000 (\$ 7)

VOLUMINA ELAPSI ANNI EDITA: IV (1912) - XV (1923) - XVI (1924) - XVII (1925) - XVIII (1926) - XIX (1927) - XX (1928) - XXI (1929) - XXII (1930) - XXIII (1931) - XXIV (1932) - XXV (1933) - XXVI (1934) - XXVII (1935) - XXVIII (1936) - XXIX (1937) - XXX (1938) - XXXI (1939) - XXXII (1940) - XXXIII (1941) - XXXIV (1942) - XXXV (1943) - XXXVI (1944) - XXXVII (1945).

Singula volumina Lit. 4000 (\$ 7)

---

**ORDO DIVINI OFFICII RECITANDI  
SACRIQUE PERAGENDI IUXTA KALENDARIVM  
UNIVERSALIS ECCLESIAE PRO ANNO DOMINI 1957**

In Italia Lit. 250 - Extra Italiam \$ 0,50

---

**PIO XII**

**ENCYCLICA "AURIETIS AQUAS"**  
CIRCA IL CULTO E LA DEVOZIONE AL SACRATISSIMO CUORE DI GESÙ

Editio anglica, gallica, germanica, hispanica, italica, lusitanica

L. 300 (\$ 0,50)

---

**MISSA IN FESTO S. IOSEPH OPIFICIS  
SPONSI B. MARIAE VIRG., CONFESSORIS**

Haec Missa forma editur omnibus Missalibus apta

Typis clarissimis, rubris et nigris. L. 25 (\$ 0,05)

**OFFICIUM IN FESTO S. IOSEPH OPIFICIS  
SPONSI B. MARIAE VIRG., CONFESSORIS**

Hoc Officium ita editum est ut ad quodlibet Breviarium accommodari possit

Typis clarissimis, rubris et nigris. L. 80 (\$ 0,20)



